

萬 有 文 庫

第一集一千種

王雲五主編

白 香 山 集

(五)

白居易著

商務印書館發行



白香山集

(五)

白居易著

國學基本叢書

白香山集

卷二十五

大唐故賢妃京兆韋氏墓誌銘 并序

德宗聖文神武皇帝元妃韋氏諱某字某。京兆人也。曾祖某某官。祖某某官。父某某官。妃卽某官府君第某女也。母曰永穆公主。元和四年四月某日。妃薨于某所。以其年四月某日。詔葬于萬年縣上好里洪平原。上悼焉。哀榮之禮。有以加焉。嗚呼。惟韋氏代德宦業。族系婚戚。有國史家牒存焉。今奉詔但書地及時與妃之所以曰賢之義而已。貞元中。沙鹿上仙。長秋虛位。凡六十九御之政。多聽於妃。妃先以采蘋之誠。奉于上。故能致霜露之感。薦于九廟。次以樛木之德。逮于下。故能分雲雨之澤。洽于六宮。其餘坐論婦道。行贊內理。服用必中度。故組紉有常訓。言動必中節。故環珮有常聲。七十二年禮無違者。册命曰賢。不亦宜哉。永貞中。號奉宮車。誓留園寢。麻衣告朔。蓬首致哀。執匪懈之心。視奠於靈坐。修無上之道。薦福于崇陵。殆茲歿身。不衰其志。故葬之日。掌文之臣。白居易得以無媿之詞。誌于墓而銘曰。

京兆阡兮。洪平原兮。歲己丑兮。日丁酉兮。惟土田兮。與時日。龜兮。蒼兮。偕言吉。蛾峨新墳兮。葬者誰。德宗皇帝韋賢妃。

唐故會王墓誌銘 并序

唐元和五年冬十一月四日。會王寢疾。薨于內邸。大小斂之日。上皆不舉樂。不坐朝。恩也。越十二月十八

日詔京兆尹播監視葬事。窆于萬年縣崇道鄉西趙原禮也。是日又詔翰林學士白居易爲之銘誌。故事也。王諱繻字某。德宗之孫。順宗之子。陛下之弟。幼有令德。早承寵章。未冠而王受封於會。夫以祖功宗德之慶。父天兄日之貴。胙土列藩之寵。好德樂善之賢。宜乎壽考福延。爲王室輔。嗚呼。降年不永。二十一而終。哀哉。皇帝厚悼睦之恩。深友悌之愛。故王之薨也。軫悼之念。有加於常情。王之葬也。遺奠之儀。有加於常數。哀榮兼備。斯其謂乎。銘曰。

歲在寅月。窮紀萬年。縣崇道里。會王薨。葬於此。

故滁州刺史贈刑部尚書滎陽鄭公墓誌銘 并序

周宣王封母弟桓公于鄭。厥後因封命氏爲滎陽人。鄭自桓公而下。平簡公而上。世家婚嗣。咸詳于史牒。故不書。公諱某字某。五代祖諱某。北齊尚書令。是爲平簡公。曾祖諱某。下邳郡太守。王父諱某。衛州刺史。皇考諱某。祕書郎。贈鄭州刺史。公卽祕書第三子。好學攻詞賦。進士中第。判入高等。始授鄆城尉。無何本郡守移他鄉。州民有暴悖者。相率遮道。麾訶不去。公忿其犯上。立斃六七人。採訪使奇之。奏署支使。改浚儀主簿。轉大理評事。兼佐漕務。彭果領五府。奏公爲節度判官。會果坐贓。連累僚佐。貶光化尉。移向城尉。歷北海。時安祿山始亂。傳檄郡邑。邑民孫俊。鄧犀。伽。馭市人。劫廩藏以應。公時已去秩。因奮呼。率寮吏子弟急擊之。殺俊。犀。伽。盡殲其黨。繇是一邑用寧。朝廷美之。擢授登州司馬。尋轉長史。累加朝散大夫。入爲太子左贊善大夫。尚書屯田員外郎。太子中允。出攝淄州刺史。俄換萊州。連有善最。詔授檢校司勳郎中。兼侍御史。充青萊登海密五州租庸使。太尉李公光弼鎮徐州。奏公爲徐州刺史。充海密沂三州招討使。

加正議大夫。賜紫金魚袋。公威惠舊著。比至部。而蒼山賊帥李浩與其徒五千來降。繇是三郡底定。復入爲衛尉少卿。相國王公縉繞河南。奏公爲副元帥判官。未幾。除祕書少監。兼滁州刺史。本州團練使。居八載。政績大成。大曆十二年二月十五日。薨于揚州。權窆于某所。享年七十有八。公凡七佐軍。四領郡。祿俸不積滯。衣食無常主。常歎曰。以飽暖活孀幼。以清白貽子孫。是吾心也。逮啓手足。卒如其志。先是太夫人常寢疾。公衣不解。髮不櫛者彌年。侍疾執喪。憂毀過禮。公尤善五言詩。與王昌齡王之煥。崔國輔輩聯唱迭和。名動一時。逮今著樂詞。播人口。非一晚賦。思舊遊詩百篇。亦傳於代。前夫人清河崔氏。贈清河郡太君。後夫人博陵崔氏。贈博陵郡君。生子七人。女七人。長子雲達。有才名。官至刑部侍郎。京兆尹。公由京兆累贈至散騎常侍。刑部尚書。次子微。終潤州司馬。次子公達。有至行。初。公年高。就養不仕。及居憂。廬墓泣血三年。淮南節度使本道黜陟使。泉朝賢。袁高。高參等。累以孝悌稱薦。響名教者。慕之。今爲侍御史。上柱國。滄景節度參謀。次子方達。衡州司士參軍。次子震。當陽丞。次子文弼。幽州參軍。次子安達。率府倉曹參軍。公自捐館舍。殆逾三紀。家國多故。未克反葬。至元和二年月日。始遷兆于鄭州新鄭縣某原。祔先祕書塋。二夫人從焉。時京兆已卽世。諸弟在下位。獨侍御史銜恤襄事。孝備始終。見託述。撰銘于墓石。銘曰。世祿德門。斯謂之可久。懿文茂績。斯謂之不朽。二千石之祿。七十八之年。斯謂之貴壽。內史之顯揚。柱史之孝行。斯謂之有後。嗚呼。鄭公榮如是。哀如是。又何不足之有。

唐河南元府君夫人滎陽鄭氏墓誌銘 并序

有唐元和元年九月十六日。故中散大夫。尚書比部郎中。舒王府長史。河南元府君諱寬。夫人滎陽縣太

君鄭氏年六十寢疾歿萬于年縣靖安里私第。越明年二月十五日。權祔于咸陽縣奉賢鄉洪瀆原。從先姑之塋也。夫人曾祖諱遠。思官至鄭州刺史。贈太常卿。王父諱瞻。朝散大夫。易州司馬。父諱濟。陸州制史。夫人陸州次女也。其出范陽盧氏。外祖諱平子。京兆府涇陽縣令。夫人有四子二女。長曰沂。蔡州汝陽尉。次曰秬。京兆府萬年縣尉。次曰積。同州韓城尉。次曰稹。河南縣尉。長女適吳郡陸翰。翰爲監察御史。次爲比丘尼。名真。一。二女不幸。皆先夫人歿。府君之爲比部也。夫人始封滎陽縣君。從夫貴也。稹之爲拾遺也。夫人進封滎陽縣太君。從子貴也。天下有五甲姓。滎陽鄭氏居其一。鄭之勳德官爵。有國史在。鄭之源派婚媾。有家牒在。比部府君世祿。官政文行。有故京兆尹鄭雲達之誌在。今所敍者。但書夫人之事而已。初。夫人爲女時。事父母以孝聞。友兄弟。睦弟妹。以悌聞。發自生知。不由師訓。其淑性有如此者。夫人爲婦時。元氏世食貧。然以豐潔家祀。傳爲貽燕之訓。夫人每及時祭。則終夜不寢。煎和滌濯。必躬親之。雖隆暑沍寒之時。而服勤親饋。面無怠色。其誠敬有如此者。元氏鄭氏皆大族。好合而姻表滋多。凡中外吉凶之禮。有疑議者。皆質於夫人。夫人從而酌之。靡不中禮。其明達有如此者。夫人爲母時。府君旣沒。積與稹方齟齬。家貧無師以受業。夫人親執詩書。誨而不倦。四五年間。二子皆以通經入仕。稹旣第。判入等。授祕書省校書郎。屬今天子始踐祚。策三科以拔天下賢俊。中第者凡十八人。稹冠其首焉。由校書郎拜左拾遺。不數月。讜言直聲。動于朝廷。以是出爲河南尉。長女旣適陸氏。陸氏有舅姑。多姻族。於是以順奉上。以惠逮下。二紀而歿。婦道不衰。內外六姻。仰爲儀範。非夫人恂恂孜孜。善誘所至。則曷能使子達於邦。女宜其家哉。其教誨有如此者。旣而諸子雖迭仕。祿秩甚薄。每至月給食。時給衣。皆始自孤弱者。次及疎賤者。由是

衣無常主。廚無異膳。親者悅。疎者來。故傭保乳母之類。有凍餒垂白。不忍去元氏之門者。而況臧獲輩乎。其仁愛有如此者。自夫人母其家。殆二十五年。專用訓誡。除去鞭扑。常以正顏色。訓諸女婦。諸女婦其心戰兢。如履于冰。常以正辭氣。誡諸子孫。其心愧恥。若撻于市。由是納下於少過。致家於大和。婢僕終歲不聞忿爭。童孺成人。不識橫楚。閨門之內。熙熙然如太古時人也。其慈訓有如此者。噫。昔漆室緹縈之徒。烈女也。及爲婦。則無聞。伯宗梁鴻之妻。哲婦也。及爲母。則無聞。文伯孟氏之親。賢母也。爲女爲婦時。亦無聞。今夫人女美如此。婦德又如此。母儀又如此。三者具美。可謂冠古今矣。嗚呼。惟夫人之道。移於他。則何用而不臧乎。若引而伸之。可以維一國焉。則關鵬鵠巢之化。斯不遠矣。若推而廣之。可以肥天下焉。則姜嫄文母之風。斯不遠矣。豈止於訓四子以聖善。化一家於仁厚者哉。居易不佞。辱與夫人幼子穉爲執友。故聆夫人美最熟。橫泣血孺慕。哀動他人。託爲撰述。書于墓石。斯古孝子顯父母之志也。嗚呼。斯文之作。豈直若是而已哉。亦欲百代之下。聞夫人之風。過夫人之墓者。使悍妻和。鬻母慈。不遜之女。順云爾。銘曰。元和歲丁亥春。咸陽道渭水濱。云誰之墓。鄭夫人。

唐揚州倉曹參軍王府君墓誌銘 并序

公諱某。字士寬。其先出自周靈王太子晉。凡二十一代而生翦。翦爲秦將軍。又二世而生珣。珣居大原。故今爲大原人。又十九代而生瓊。瓊爲後魏僕射。諡孝簡公。又二代而生曾祖諱滿。官爲河南府王屋縣令。王父諱大瓏。爲嘉州司馬。父諱昇。爲京兆府咸陽令。河南府伊闕令。有文行學術。應制舉。對沈謀祕略策。登科。詩入正聲集。公卽伊闕第三子。好學善屬文。天寶中。應明經舉。及第。選授婺州義烏縣尉。以清幹稱。

刺史章之晉知之。署本州防禦判官。無何。租庸轉運使元載又知之。假本州司倉。專掌運務。歲終課績。居多。遂奏聞。真授。永泰中。勅遷越府戶曹。屬邑有不理者。公假領之。所至必理。大曆中。本道觀察使薛兼訓。以公清白尤異。表奏之。有詔。權知餘姚縣令。時海寇初殄。邑焚田荒。公乃營邑室。創器用。復流庸。闢菑畝。凡江南列邑之政。公冠其首。其制邑。闢田增戶之績。則會稽之牒。地官之籍。載焉。建中初。選授揚州倉曹參軍。至五年七月二十六日。疾歿于江都縣之私第。春秋六十二。夫人清河崔氏。鳳閣舍人融之姪孫。鄭州司戶法昂之女。婦順母訓。中外師之。貞元二十年十一月十三日。疾終于三原縣之官舍。享年六十二。有子曰播。曰炎。曰起。咸以進士舉。及第。播。應制舉。對直言極諫策。授集賢殿校書郎。累遷監察殿中侍御史。三原令。炎。既第。未仕。起。應博學宏詞科。選授集賢殿校書郎。昆弟三人。不十年而五。登甲第。時論者榮之。一女適范陽盧仲通。播等號護靈輿。以永貞元年十月二十五日。遷祔于京兆府富平縣淳化鄉之某原。從吉兆也。嗚呼。夫懋言行。蓄事業。俾道積于躬者。在人也。踐大官。贊元化。俾功加于民者。由命也。有其入。無其命。雖聖與賢。無可奈何。維公受天地之和。積爲行。發爲文。宜爲用。故在家以孝友聞。行己以清廉聞。蒞事以幹蠱聞。如金玉在佩。動而有聲。其大者又常以經德秉哲。致君濟人爲己任。有識者深知之。宜乎作王者心膺耳目之官。以經緯其邦家。而才爲時生。道爲命屈。名雖聞於天子。位不過於陪臣。鬱鬱然歿而不展其用者。命矣夫。古人云。有明德大智者。若不當世。其後必有餘慶。今其將在後嗣乎。不然者。何乃德行政事文學之具美。叢乎公之三子乎。天其或者殆將肥王氏之家。大王氏之門。以甚明報施之道者也。某不佞。頃對策於王庭也。與炎同升諸科焉。祇命於憲府也。與播聯執其簡焉。及爲考文之官也。又

起在選中焉。辱與公之三子游。而聆公之遺風甚熟。故作斯文。無隱情。無愧辭焉。銘曰。
纒山道光。淮水靈長。繩繩子孫。代有賢良。將軍輔秦。武功抑揚。孝簡翊魏。文德闡彰。降及於公。實生于唐。
大智全才。應用無方。作掾于郡。三語有章。承乏於邑。一同載康。展如之人。何用不臧。宜登大位。俾紹前芳。
嗚呼。白鍊之金。不鑄于將。十圍之材。不作棟梁。公亦如之。與世不當。道不虛行。後嗣其昌。

唐故坊州鄜城縣尉陳府君夫人白氏墓誌銘 并序

夫人大原白氏。其出昌黎韓氏。其適潁川陳氏。享年七十。唐和州都督諱士通之曾孫。尚衣奉御諱志善之玄孫。都官郎中諱溫之孫。延安令諱鯉之弟某女。韓城令諱欽之外孫。故鄜城尉諱潤之夫人。故潁川縣君之母。故大理少卿襄州別駕諱季庚之姑。前京兆府戶曹參軍翰林學士白居易。前祕書省校書郎行簡之外祖母也。惟夫人在家以和順奉父母。故延安府君視之如子。既笄。以柔正從人。故鄜城府君敬之如賓。洎延安終。夫人哀毀過禮。爲孝女。洎鄜城歿。夫人撫訓幼女。爲節婦。及居易行簡生。夫人鞠養成。人爲慈祖母。迨乎潔蒸嘗。敬賓客。睦娣姒。工刀尺。善琴書。皆出於餘力焉。貞元十六年夏四月一日。疾歿于徐州古豐縣官舍。其年冬十一月。權窆于符離縣之南偏。至元和八年春二月二十五日。改卜宅兆于華州下邽縣義津鄉北原。卽潁川縣君新塋之西坎。從存歿之志。居易等號慕慈德。敬撰銘誌。泣血秉筆。言不成文。銘曰。
恭惟夫人。女孝而純。婦節而溫。母慈而勤。嗚呼。謹揚三德。銘于墓門。恭惟夫人。實生我親。實撫我身。欲養不待。仰號蒼旻。嗚呼。豈寸魚之心。能報東海之恩。

唐大原白氏之殤墓誌銘 并序

白氏下殤曰幼美。小字金剛奴。其先大原人。高祖諱志善。尚衣奉御。曾祖諱溫。都官郎中。王父諱鏗。河南府鞏縣令。先府君諱季庚。大理少卿。山東別駕。先大夫人潁川陳氏。封潁川縣君。幼美卽第四子也。旣生而惠。旣孩而敏。七歲能誦詩賦。八歲能讀書鼓琴。九歲不幸遇疾。天徐州符離縣私第。貞元八年九月。權窆于縣南原。元和八年春二月二十五日。改葬于華州下邽縣義津鄉北岡。祔于先府君宅兆之東三十步。其兄居易。行簡。藐然已孤。扶哀臨穴。斷手足之痛。其心如切。且號其銘誌于墓曰。嗚呼。剛奴痛矣哉。念爾九歲逝不迴。埋魂闕骨長夜臺。二十年後復一開。昔葬符離今下邽。魂兮魂兮隨骨來。

卷二十六

江州司馬廳記

自武德已來。庶官以便宜制事。大攝小。重侵輕。郡守之職。擲於諸侯帥。郡佐之職。移於部從事。故自五大都督府。至于上中下郡司馬之事。盡去。唯員與俸在。凡內外文武官。左遷右移者。遞居之。凡執役事。上與給事於省寺軍府者。遙署之。凡仕久資高。耄昏軟弱。不任事而時不忍棄者。實莅之。莅之者。進不課其能。退不殿其不能。才不才一也。若有人畜器貯用。急於兼濟者。居之雖一日不樂。若有人養志忘名。安於獨善者。處之雖終身無悶。官不官繫乎時也。適不適在乎人也。江州左匡廬。右江湖。土高氣清。富有佳境。刺

史守士臣。不可遠觀遊。羣吏執事官。不敢自暇佚。惟司馬綽綽。可以從容於山水詩酒間。由是郡南樓。山北樓。水溢亭。百花亭。風篁石巖。瀑布廬宮。源潭洞。東西二林寺。泉石松雪。司馬盡有之矣。苟有志於吏隱者。捨此官何求焉。案唐典。上州司馬秩五品。歲廩數百石。月俸六七萬。宮足以庇身。食足以給家。州民康非司馬功。郡政壞。非司馬罪。無言責。無事憂。噫。爲國謀則尸素之尤蠹者。爲身謀則祿仕之優穩者。予佐是郡行四年矣。其心休休如一日。二日何哉。識時知命而已。又安知後之司馬。不有與吾同志者乎。因書所得以告來者。時元和十三年七月八日記。

草堂記

匡廬奇秀。甲天下。山北峯曰香鑪。峯北寺曰遺愛寺。介峯寺間。其境勝絕。又甲廬山。元和十一年秋。大原人白樂天。見而愛之。若遠行客過故鄉。戀戀不能去。因面峯腋寺。作爲草堂。明年春。草堂成。三間兩柱。二室四牖。廣袤豐殺。一稱心力。洞北戶。來陰風。防徂暑也。敞南棊。納陽日。虞祁寒也。木斲而已。不加丹。牆圻而已。不加白。礧階用石。霧窗用紙。竹簾紵幃。率稱是焉。堂中設木榻四。素屏二。漆琴一。張儒道佛書各三兩卷。樂天既來。爲主。仰觀山。俯聽泉。傍睨竹樹雲石。自辰及酉。應接不暇。俄而物誘氣隨。外適內和。一宿體寧。再宿心恬。三宿後。頽然喏然。不知其然而然。自問其故。答曰。是居也。前有平地。輪廣十丈。中有平臺。半平地。臺南有方池。倍平臺。環池多山竹野卉。池中生白蓮白魚。又南抵石澗。夾澗有古松老杉。大僅十人圍。高不知幾百尺。修柯戛雲。低枝拂潭。如幢豎。如蓋張。如龍蛇走。松下多灌叢。蘿薦葉蔓。駢織承翳。日月光不到地。盛夏風氣如八九月時。下鋪白石。爲出入道。堂北五步。據層崖積石。嵌空垤塊。雜木異草。

蓋覆其上。綠陰蒙蒙。朱實離離。不識其名。四時一色。又有飛泉。植茗就以烹燂。好事者見。可以永日。堂東有瀑布。水懸三尺。瀉階隅。落石渠。昏曉如練色。夜中如環珮。琴筑聲。堂西倚北崖。右趾以剖竹架空。引崖上泉。脈分線懸。自簷注砌。纍纍如貫珠。霏微如雨露。滴瀝飄灑。隨風遠去。其四傍耳目杖屨可及者。春有錦繡谷花。夏有石門澗雲。秋有虎谿月。冬有鱸峯雪。陰晴顯晦。昏旦含吐。千變萬狀。不可殫紀。覲縷而言。故云甲廬山者。噫。凡人豐一屋。華一簣。而起居其間。尚不免有驕矜之態。今我爲是物主。物至致知。各以類至。又安得不外適內和。體寧心恬哉。昔永遠宗雷輩十八人。同入此山。老死不反。去我千載。我知其心。以是哉。矧予自思。從幼迨老。若白屋。若朱門。凡所止。雖一日二日。輒覆簣土爲臺。聚拳石爲山。環斗水爲池。其喜山水病癖如此。一旦蹇剝。來佐江郡。郡守以優容而撫我。廬山以靈勝待我。是天與我時。地與我所。卒獲所好。又何以求焉。尚以冗員所羈。餘累未盡。或往或來。未遑寧處。待予異時。弟妹婚嫁畢。司馬歲秩滿。出處行止。得以自遂。則必左手引妻子。右手抱琴書。終老於斯。以成就我平生之志。清泉白石。實開此言。時三月二十七日。始居新堂。四月九日。與河南元集虛。范陽張允中。南陽張深之。東西二林長老。湊朗。滿。晦。堅等。凡二十有二人。具齋施茶果以落之。因爲草堂記。

許昌縣令新廳壁記

民非政不乂。政非官不舉。官非署不立。是三者相爲用。故古君子有雖一日必葺其牆屋者。以是哉。許昌縣居梁鄭陳蔡間。要路由於斯。當建中貞元之際。大軍聚於斯。兵殘其民。火焚其邑。大田生荆棘。官舍爲煨燼。乘其弊而爲政。作事者其難乎。去年春。叔父自徐州。士曹掾選署厥邑令。於是約己以清白。納人以

簡直立事以強毅。以清白。故官吏不敢侵于民。以簡直。故獄訟不得留于庭。以強毅。故軍鎮不能干于縣。由是居二年。民用康政。用暇。乃曰。儲蓄邦之本。命先營困倉。又曰。公署吏所寧。命次圖廳事。取材於土物。取工於子來。取時於農隙。然後豐約量其力。廣狹稱其位。儉不至陋。壯不至驕。庇身無燥溼之憂。視事有朝夕之利。官由是而立。政由是而舉。民由是而乂。建一物而三事成。其孰不韙之哉。烏虜。吾家世以清簡垂爲貽燕之訓。叔父奉而行之。不敢失墜。小子舉而書之。亦無愧辭。若其官邑之省置。風物之有亡。田賦之上下。蓋存乎圖讎。此略而不書。今但記斯廳之時制。與叔父作爲之所由也。先是邑居不修。屋壁無紀。前賢姓字湮泯無聞。而今而後。請居厥位者。編其年月名氏。自叔父始。時貞元十九年冬十月一日記。

養竹記

竹似賢何哉。竹本固。固以樹德。君子見其本。則思善建不拔者。竹性直。直以立身。君子見其性。則思中立不倚者。竹心空。空以體道。君子見其心。則思應用虛受者。竹節貞。貞以立志。君子見其節。則思砥礪名行夷險一致者。夫如是。故君子人多樹之爲庭實焉。貞元十九年春。居易以拔萃選及第。授校書郎。始於長安求假居處。得常樂里故關相國私第之東亭而處之。明日履及于亭之東南隅。見叢竹於斯。枝葉殄瘁。無聲無色。詢于關氏之老。則曰。此相國之手植者。自相國捐館。他人假居。絲是筐篋者。斬焉。籜箬者。刈焉。刑餘之材。長無尋焉。數無百焉。又有凡草木雜生其中。華茸蒼鬱。有無竹之心焉。居易惜其嘗經長者之手。而見賤俗人之目。翦棄若是。本性猶存。乃芟鬻蒼。除糞壤。疏其間。封其下。不終日而畢。於是日出有清陰。風來有清聲。依依然。欣欣然。若有情於感遇也。嗟乎。竹。植物也。於人何有哉。以其有似於賢。而人愛惜。

之。封植之。況其眞賢者乎。然則竹之於草木。猶賢之於衆庶。嗚呼。竹不能自異。惟人異之。賢不能自異。惟用賢者異之。故作養竹記書于亭之壁。以貽其後之居斯者。亦欲以聞於今之用賢者云。

記畫

張氏子得天之和。心之術。積爲行。發爲藝。藝尤者其畫歟。畫無常工。以似爲工。學無常師。以眞爲師。故其措一意識。狀一物。往往運思中。與神會。髣髴焉。若歐和役靈於其間者。時予在長安中。居甚閑。聞甚熟。乃請觀於張。張爲予盡出之。厥有山水。松石。雲霓。鳥獸。暨四夷六畜。妓樂。華蟲。咸在焉。凡十餘軸。無動植無小大。皆曲盡其能。莫不向背無遺勢。洪纖無遁形。迫而視之。有似乎水中。了然分其影者。然後知學在骨髓。者。自心術得。工。倖造化者。由天和來。張但得於心。傳於手。亦不自知其然而然也。至若筆精之英華。指趣之律度。予非畫之流也。不可得而知之。今所得者。但覺其形眞而圓。神和而全。炳然儼然。如出於圖之前而已耳。張始年二十餘。致功甚近。予意其生知之。藝與年而長。則畫必爲希代寶。必爲後學師。恐將來者失其傳。故以年月名氏紀于圖軸之末云。時貞元十九年。清河張敦簡畫。六月十日。大原白居易記。

記異

華州下邽縣東南三十餘里。曰延年里。里西南有故蘭若。而無僧居。元和八年秋七月。予從祖兄曰皞。自華州來訪予。途出於蘭若前。及門。見婦女十許人。服黃綠衣。少長雜坐。會語於佛屋下。聲聞于門。兄熱行方渴。將就憩。且求飲。望其從者。蕭士清未至。因下馬。自繫韁於門柱。舉首。忽不見。意其退藏於窗闥之間。從之。不見。又意其退藏於屋壁之後。從之。又不見。周視其四旁。則牆堵環然。無隙缺。覆視其族談之所。則

塵埃霽然無足迹。繇是知其非人。怵然大異之。不敢留。上馬疾驅來告。予亦異之。因訊其所聞。兄曰。云云甚多。不能殫記。大抵多云胤王老於此。觀其辭意。若相與數其過者。厥所去予舍八九里。因同往訪焉。果有王胤者。年老。卽其里人也。方徙居於蘭若東百餘步。葺牆屋。築塲。藪樹僅畢。明日而入。旣入。不浹辰而胤死。不越月而妻死。不逾時而胤之二子與二婦一孫死。餘一子曰明進。大恐懼。不知所爲。意新居不祥。乃撤屋拔樹夜徙去。遂獲全焉。嘻。推而徵之。則衆君子謀於社以亡曹。婦人來焚糜竺之室。信不虛矣。明年秋。予與兄出遊。因復至是。視胤之居。則井湮。龜夷。闕然唯環牆在。里人無敢居者。異乎哉。若然者。命數耶。偶然耶。將所徙之居非吉土耶。抑王氏有隱慝。鬼得謀而誅之耶。茫乎不識其由。且志於佛室之壁。以俟辨惑者。九月七日太原白樂天云。

東林寺經藏西廊記

元和初。江西觀察使韋君丹於廬山東林寺神運殿左。甘露壇右。建修多羅藏一所。土木丹漆之外。飾以多寶相好。嚴麗鄰諸鬼功。雖兩都四方。或未前見。一切經典。盡在于內。蓋釋宮之天祿石渠也。初藏旣成。南東北廊亦具。獨西未作。而韋君薨。迨今十餘年。風日所飄燥。雪雨所需溼。西南一隅。壞有日矣。僧坊衆惜之。予亦惜之。非不是圖。財力不足。暨十三年。予作景雲律師塔碑成。景雲弟子饋絹百匹。予以法施淨財。義不已有。卽日移用作藏西廊。因請寺長老演公。滿公。琳公等。經之。寺綱維令杲靈達等成之。蓋欲護前功。償始願。非任於布施相功德心也。其集經名數與創藏緣由。詳于李肇碑文。此但書新作西廊而已。十四年月日。忠州刺史白居易記。

三遊洞序

平淮西之明年冬。予自江州司馬授忠州刺史。微之自通州司馬授虢州長史。又明年春。各祇命之郡。與知退偕行。三月十日。參會於夷陵。翌日。微之反棹送予。至下牢戍。又翌日。將別未忍。引舟上下者久之。酒酣。聞石間泉聲。因捨棹進策。步入缺岸。初見石如疊。如削。其怪者如引臂。如垂幢。次見泉如瀉。如灑。其奇者如懸練。如不絕線。遂相與維舟巖下。率僕夫芟蕪刈翳。梯危絕滑。休而復上者凡四五焉。仰睇俯察。絕無人迹。但水石相薄。磷磷鑿鑿。跳珠濺玉。驚動耳目。自未訖戾。愛不能去。俄而峽山昏黑。雲破月出。光氣含吐。互相明滅。晶熒玲瓏。象生其中。雖有敏口。不能名狀。旣而通夕不寐。迨旦將去。憐奇惜別。且歎且言。知退曰。斯境勝絕。天地間其有幾乎。如之何。俯通津縣。歲代寂寥。委置罕有到者乎。予曰。借此喻彼。可爲長太息者。豈獨是哉。豈獨是哉。微之曰。誠哉是言。矧吾人難相逢。斯境不易得。今兩偶於是。得無述乎。請各賦古調詩二十韻。書於石壁。仍命予序而紀之。又以吾三人始遊。故目爲三遊洞。洞在峽州上二十里北峯下。兩崖相廡。間欲將來好事者知。故備書其事。

遊大林寺序

余與河南元集虛。范陽張允中。南陽張深之。廣平宋郁。安定梁必復。范陽張特。東林寺沙門法演。智滿。士堅。利辨。道深。道建。神照。雲臯。恩慈。寂然。凡十七人。自遺愛草堂。歷東西二林。抵化城。憩峯頂。登香鑪峯。宿大林寺。大林窮遠。人迹罕到。環寺多清流蒼石。短松瘦竹。寺中惟板屋木器。其僧皆海東人。山高地深。時節絕晚。於時孟夏。如正二月天。山桃始華。澗草猶短。人物風候。與平地聚落不同。初到恍然。若別造一世。

界者。因口號絕句云。人間四月芳菲盡。山寺桃花始盛開。長恨春歸無覓處。不知轉入此中來。既而周覽屋壁。見蕭郎中存。魏郎中弘簡。李補闕。渤三人姓名詩句。因與集虛輩歎且曰。此地實匡廬間第一境。由驛路至山門。曾無半日程。自蕭魏李遊。迨今垂二十年。寂寥無繼來者。嗟乎。名利之誘人也如此。時元和十二年四月九日太原白樂天序。

代書

廬山自陶謝泊十八賢已還。儒風緜緜。相續不絕。貞元初。有符載。楊衡輩隱焉。亦出爲文人。今其讀書屬文。結草廬於巖谷間者。猶一二十人。卽其中秀出者。有彭城人劉軻。軻開卷慕孟軻爲人。秉筆慕揚雄。司馬遷爲文。故著翼孟三卷。象龍子十卷。雜文百餘篇。而聖人之旨。作者之風。雖未臻極。往往而得。予佐潯陽三年。軻每著文。輒來示予。予知軻志不息。異日必能跨符揚而攀陶謝。軻一旦盡賣所著書。及所爲文。訪予。告行欲舉進士。予方淪落江海。不足以發軻事業。又羸病無心力。不能徧致書於臺省故人。因援紙引筆寫胸中事授軻。且曰。子到長安。持此札爲予謁集賢。庾三十二補闕。翰林杜十四拾遺。金部元八員外。監察牛二侍御。祕省蕭正字。藍田楊主簿兄弟。彼七八君子。皆予文友。以予愚直。常信其言。苟于今不我欺。則予之道庶幾光明矣。又欲使平生故人知我形體已悴。志氣已憊。獨好善喜才之心未死去矣。特此代書。三月十三日樂天白。

送侯權秀才序

貞元十五年秋。予始舉進士。與侯生俱爲宣城守所貢。明年春。予中春官第。旣入仕。凡歷四朝。才朽命剝。

蹇躓不暇。去年冬。蒙不次恩。遷尚書郎。掌誥西掖。然青衫未解。白髮已多矣。時子尙爲京師旅人。見除書。走來賀予。因從容問其宦名。則曰無得矣。問其生業。則曰無加矣。問其僕乘囊輜。則曰日消月賒矣。問別來幾何時。則曰二十有三年矣。嗟乎侯生。當宣城別時。才文志氣。我爾不相下。今予猶小得遇。子卒無成。由予而言。子不爲不遇耳。嗟乎侯生。命實爲之。謂之何哉。言未竟。又有行色。且曰欲謁東諸侯。恐不我知者。多請一言以寵別。予方直閣。慨然竊書命筆以序之爾。

冷泉亭記

東南山水。餘杭郡爲最。就郡言。靈隱寺爲尤。由寺觀言。冷泉亭爲甲。亭在山水中央。寺西南隅。高不倍尋。廣不累丈。而撮奇得要。地搜勝概。物無遁形。春之日。吾愛其草薰薰。木欣欣。可以導和納粹。暢人血氣。夏之夜。吾愛其泉淅淅。風泠泠。可以蠲煩析醒。起人心情。山樹爲蓋。巖石爲屏。雲從棟生。水與階平。坐而翫之者。可濯足於牀下。臥而狎之者。可垂釣於枕上。矧又潺湲潔澈。粹冷柔滑。若俗士若道人。眼耳之塵。心舌之垢。不待盥滌。見輒除去。潛利陰益。可勝言哉。斯所以最餘杭而甲靈隱也。杭自郡城抵四封。叢山複湖。易爲形勝。先是領郡者有相里君造虛白亭。有韓僕射臯作候仙亭。有裴庶子棠棣作觀風亭。有盧給事元輔作見山亭。及右司郎中河南元冀最後作此亭。於是五亭相望。如指之列。可謂佳境殫矣。能事畢矣。後來者雖有敏心巧目。無所加焉。故吾繼之。述而不作。長慶三年八月十三日記。

書 凡三首

與楊虞卿書

師臯足下。自僕再來京師。足下守官鄆縣。吏職拘絆。相見甚稀。凡半年餘。與足下開口而笑者。不過三四。及僕左降詔下。明日而東。足下從城西來。抵昭國坊。已不及矣。走馬至滄水。才及一執手。憫然而訣。言不及他。邇來雖手札一二往來。亦不過問道途。報健否而已。鬱結之志。曠然未舒。思欲一陳左右者久矣。去年六月。盜殺右丞相於通衢中。迸血髓。磔髮肉。所不忍道。合朝震慄。不知所云。僕以爲書籍以來。未有此事。國辱臣死。此其時耶。苟有所見。雖吠畝皂隸之臣。不當默默。況在班列而能勝其痛憤耶。故武相之氣。平明絕。僕之書奏日午入。兩日之內。滿城知之。其不與者。或誣以僞言。或構以非語。且浩浩者不酌時事。大小與僕言當否。皆曰丞郎給舍諫官御史尙未論請。而贊善大夫何反憂國之甚也。僕聞此語。退而思之。贊善大夫誠賤冗耳。朝廷有非常事。卽日獨進封章。謂之忠。謂之憤。亦無媿矣。謂之妄。謂之狂。又敢逃乎。且以此獲辜。顧何如耳。況又不以此爲罪名乎。此足下與崔李元庾輩十餘人爲我悒悒鬱鬱長太息者也。然僕始得罪於人也。竊自知矣。當其在近職時。自惟賤陋。非次寵擢。夙夜腆愧。思有以稱之。性又愚昧。不識時之忌諱。凡直奏密啓外。有合方便聞於上者。稍以歌詩導之。意者欲其易入而深誠也。不我同者。得以爲計。媒孽之辭一發。又安可君臣之道。間自明白其心乎。加以握兵於外者。以僕潔慎不受賂而憎。秉權於內者。以僕介獨不附己而忌。其餘附麗之者。惡僕獨異。又信狺狺吠聲。唯恐中傷之不獲。以此得罪。可不悲乎。然而寮友益相重。交游益相信。信於近而不信於遠。亦何恨哉。近者少。遠者多。多者勝。少

者不勝。又其宜矣。師臯僕之是言不發於他人。獨發於師臯。師臯知我者。豈有愧於其間哉。苟有愧於師臯。固是言不發矣。且與師臯始於宣城相識。迨于今十七八年。可謂故矣。又僕之妻。卽足下從父妹。可謂親矣。親如是。故如是。人之情又何加焉。然僕與足下相知則不在此。何者。夫士大夫家。閨門之內。朋友不能知也。閨門之外。姻族不能知也。必待友且姻者。然後周知之。足下視僕莅官事。擇交友。接賓客。何如哉。又視僕撫骨肉。待妻子。馭僮僕。又何如哉。小者近者。尙不敢不盡其心。況大者遠者也。所謂斯言無愧而後發矣。亦猶僕之知師臯也。師臯孝敬友愛之外。可略而言。足下未應舉時。嘗充賢良直言之賦。其所對問。志磊磊而詞諤諤。雖不得第。僕始愛之。及與獨孤補闕書。讓不論事。與盧侍郎書。請不就職。與高相書。諷成致仕之志。志益大而言益遠。而僕愛重之心。繇是加焉。近者足下與李弘慶友善。弘慶客長安中。貧甚而病亟。足下爲逆致其母。安慰其心。自損衣食。以續其醫藥。甘旨之費。有年歲矣。又足下與崔行儉游。行儉非罪下獄。足下意其不幸。及於流竄。勅下之日。躬俟於御史府門。而行李之具。養活之物。崔生顧其旁。一無闕者。其餘奉寡姊。親護其夫喪。撫孤甥。誓畢其婚嫁。取貴人子爲婦。而禮法行於家。由甲乙科入官。而吏聲聞於邑。凡此者。皆可以激揚頹俗。表正士林。斯僕所以嚮慕勤勤。豈敢以骨肉之姻。形骸之舊。爲意哉。然足下之美如此。而僕側聞蚩蚩之徒。不悅足下者。已不少矣。但恐道日長。而毀日至。位益顯。而謗益多。此伯寮所以愬仲由。季孫所以毀夫子者也。昔衛玠有云。人之不逮。可以情恕。非意之加。可以理遣。故至終身無喜慍色。僕雖不敏。常佩此言。師臯人生未死間。千變萬化。若不情恕於外。理遣於中。欲何爲哉。欲何爲哉。僕之是行也。知之久矣。自度命數。亦其宜然。凡人情通達。則謂由人窮塞。而後信命。僕則

不然。十年前。以固陋之姿。瑣劣之藝。與敏手利足者齊驅。豈合有所獲哉。然而求名而得名。求祿而得祿。人皆以爲能。僕獨以爲命。命通則事偶。事偶則幸來。幸之來。尚歸之於命。不幸之來也。捨命復何歸哉。所以上不怨天。下不尤人者。實如此也。又常照鏡。或觀寫真。自相形骨。非貴富者必矣。以此自決。益不復疑。故寵辱之來。不至驚怪。亦足下素所知也。今日安時順命。用遣歲月。或免罷之後。得以自由。浩然江湖。從此長往。死則葬魚鼈之腹。生則同鳥獸之羣。必不能與掎聲攫利者。權量其分寸矣。足下輩無復見僕之光塵於人寰間也。多謝故人。勉樹令德。粗寫鄙志。兼以爲別。居易頓首。

與陳給事書

正月日。鄉貢進士白居易謹遣家僮奉書獻於給事閣下。伏以給事門屏間請謁者如林。獻書者如雲。多則多矣。然聽其辭。一辭也。觀其意。一意也。何者。率不過有望於吹噓翦拂耳。居易則不然。今所以不請謁而奉書者。但欲貢所誠實所疑而已。非如衆士有求於吹噓翦拂也。給事得不獨爲之少留意乎。大凡自號爲進士者。無賢不肖。皆欲求一第。成一名。非居易之獨慕耳。旣慕之。所以切不自揆。嘗勤苦學文。迨今十年。始獲一貢。每見進士之中。有一舉而中第者。則欲勉狂簡而進焉。又見有十舉而不第者。則欲引鷲鈍而退焉。進退之宜。固昭昭矣。而遇者自惑於趣舍。何哉。夫蘊奇挺之才。亦不自保其必勝。而一上得第者。非他也是。主司之明也。抱瑣細之才。亦不自知其妄動。而十上下第者。亦非他也是。主司之明也。豈非知人易而自知難耶。伏以給事天下文宗。當代精鑑。故不揆淺陋。敢布腹心。居易鄙人也。上無朝廷附麗之援。次無鄉曲吹噓之譽。然則孰爲而來哉。蓋所仗者文章耳。所望者主司至公耳。今禮部高侍郎爲主

司則至公矣。而居易之文章可進也。可退也。切不可不知之。欲以進退之疑。取決於給事。給事其能捨之乎。居易聞神嘗靈龜者無常心。苟叩之者不以誠則已。若以誠叩之。必以信告之。無貴賤。無大小。而不之應也。今給事鑒如水鏡。言爲蒼龜。邦家大事。咸取決於給事。豈獨遺其微小乎。謹獻雜文二十首。詩一百首。伏願俯察惘誠。不遺賤小。退公之暇。賜精鑒之一加焉。可與進也。乞諸一言。小子則磨鉛策蹇。聘力於進取矣。不可進也。亦乞諸一言。小子則息機斂迹。甘心於退藏矣。進退之心。交爭於胸中者有日矣。幸一言以蔽之。旬日之間。敢佇報命。塵穢聽覽。若奪氣褫魄之爲者。不宜居易謹再拜。

爲人上宰相書一首

二月十九日。某官某乙謹拜。手奉書獻於相公執事。書曰。古人云。以水投石。至難也。某以爲未甚難也。以卑于尊。以賤合貴。斯爲難矣。何者。夫尊貴人之心。堅也。強也。不轉也。甚於石焉。卑賤人之心。柔也。弱也。自下也。甚於水焉。則其合之難也。豈不甚於水投石哉。然則自古及今。往往有合者。又何哉。此蓋以心遇心。以道濟道故也。苟心相見。道相通。則水反爲石。石反爲水。則其合之易也。又甚乎以石投水焉。何者。石之投水也。猶觸之有聲。受之有波。心道之相得也。則貴者不知其貴也。賤者不知其賤也。當其冥同。訢合之際。但瞭然已而矣。其合之易也。豈不甚於石投水哉。噫。厥道廢墜。不行於代久矣。故貴者自貴耳。賤者自賤耳。雖同心同道。不求相合也。今某之心。與相公之心。愚智不侔也。今某之道。與相公之道。大小不倫也。矧又尊卑貴賤之勢相懸。如石焉。如水焉。而欲強至難爲至易。無乃不可乎。然則知其不可而爲之者。抑有由。伏以相公方今佐裁成之道。當具瞻之初。竊希變天下水石之心。自相公始也。通天下貴賤之道。自

某始也不然者。夫豈不自知其狂進妄動哉。伏望少留聽而畢辭焉。幸甚幸甚。某伏觀先皇帝之知遇相公也。雖古君臣道合者無以加也。然竟不與大位。不授大權。不盡行相公之道者何哉。識者以爲先皇父子孝慈之間亦古未有也。蓋先皇所以輒以知人之明。用賢之功。致理之德。以留賜今上也。亦猶太宗黜李勣而使高宗寵用之也。故今上在諒陰而特用也。相公自郎官而特拜也。推此二者。有以見識者之言信矣。斯則先皇知遇之恩。貽燕之念。今上速用之旨。倚賴之誠。相公寵擢之榮。託寄之重。自國朝已來。三者兼之甚鮮矣。故某竊惟相公自拜命已來。八九日得食不暇飽。得寢不暇安。行則慄然。居則惕然。思所以答先皇之知。副今上之用。允天下之望哉。某竊以爲必然矣。況今主上肇撫蒼生。初嗣洪業。雖物不改舊。而令宜布新。是以百辟傾心。懷懷然以待主上之政也。萬姓注目。專專然以望主上之令也。四夷側耳。颯颯然以聽主上之風也。豈直若此而已哉。蓋待其政者。勤墮邪正繫其中焉。望其令者。憂喜親疏生其中焉。聽其風者。畏侮動靜出其中焉。而將來理亂之根。安危之源。盡在於三者之中矣。如此。則相公得不匡輔其政。緝熙其令。宣和其風乎。然則匡輔緝熙宣和之道。某雖不敏。嘗聞於師焉。曰。天子之耳。待宰相之耳。而後聰也。天子之目。待宰相之目。而後明也。天子之心。識待宰相之心。識而後聖神也。宰相之耳。待天下之耳。而後聰也。宰相之目。待天下之目。而後明也。宰相之心。識待天下之心。識而後啓發聖神也。然則下取天下耳目心識。上以爲天子聰明神聖者。此宰相之本職也。而爲匡輔緝熙宣和之道也。若宰相唯以兩耳聽之。兩目視之。一心思之。則朝廷得失。豈盡知見乎。必不盡也。而況於天下之得失乎。宰相之耳目得聰明乎。必未也。而況於上以爲天子聰明聖神乎。然則天下聰明心識。取之豈無其道耶。必有也。

在乎知與不知。行與不行耳。噫。自開元已來。斯道寢衰。鮮能行者。自貞元已來。斯道寢微。鮮能知者。豈唯不知乎。不行乎。又將背古道而馳者也。何者。古者宰相以危言危行。扶危持顛爲心。今則敏行遜言。全身遠害而已矣。古者宰相取天下耳目。心識爲用。今則專任其兩耳兩目。一心而已矣。古者宰相以接士爲務。今則不接賓客而已矣。古者宰相以開閣爲名。今則鎖其門第而已矣。致使天下之聰明盡委棄於草木中焉。天下之心識盡沉沒於泥土間焉。則天下聰明心識萬分之中。宰相何嘗取得其一分哉。是故寵益崇而謗益厚。歲彌久而愧彌深。至乃上負主恩。下斂人怨。行止寢食自有慚色者。夫豈非不得天下聰明心識之所致耶。然則爲宰相者。得不思易其轍乎。是以聰明損於上。則正直銷於下。畏忌慎默之道長。公議忠讜之路塞。朝無敢言之士。庭無執咎之臣。自國及家。寢以成弊。故父訓其子曰。無介直以立仇敵。兄教其弟曰。無方正以賈悔尤。先達者用以養身。後進者資而取仕。日引月長。熾然成風。識者腹非而不言。愚者心競而是效。至使天下有目者如瞽也。有耳者如聾也。有口者如含鋒刃也。如此。則上之得失。下之利病。雖欲匡救。何由知之。嗟乎。自古以來。斯道之弊。恐未甚於今日也。然則爲宰相者。得不思變其風乎。是以慎忌積於中。則政事廢於表。因循苟且之心作。強毅久大之性虧。反謂率職而舉者不達於時宜。當官而行者不通於事變。故殿最之書雖具而不實。黜陟之法雖備而不行。欲望惡者懲。善者勸。或恐難矣。古之善爲宰相者。豈盡得賢而用之乎。豈盡知不肖而去之乎。蓋在於秉鈞軸之樞。握刀尺之要。剗邪爲正。削觚爲圓。能使善之必遷。不謂善之盡有。能使惡之必改。不謂惡之盡無。成此功者。無他。懲勸之所致耳。然則爲宰相者。得不思提其綱。使羣目自皆張乎。是以懲勸息於此。則賢能乏於彼。故岳鎮闕而不

知所取。臺省空而不知所求。今則尙書六司之官暨于百執事者。大凡要劇者多虛其位。閑散者咸備其官。或曰所以難其人。重其祿也。嗟乎。徒知難其人而闕之。不知邦政日歸於下吏也。徒知重其祿而愛之。不知稍食日費於冗員也。損益利害。豈不明哉。古之善爲宰相者。虛其懷。直其氣。苟有舉一賢者。必從而索之。苟有薦一善者。必隨而用之。然後明察否臧。精考真僞。得人者行。進賢之賞。謬舉者坐。不當之辜。自然審輪轅以相求。謹關梁以相保。故才無乏用。國無廢官。豈可疑所舉之未精。而反失其善。重所仕而不苟。而反廢其官。與其廢官。寧其虛授。與其失善。寧其謬升。但在乎明覈是非。必行賞罰。則謬升虛授。當自辨焉。然則爲宰相者。得不思振其頽。使衆毛皆舉乎。是以庶政闕於內。則庶事斁於外。至使天下之戶口日耗。天下之士馬日滋。游手於道途。市井者不知歸。託足於軍籍。釋流者不知反。計數之吏日進。取斂之法日興。田疇不闢。而麥禾之賦日增。桑麻不加。而布帛之價日賤。吏部則士人多而官員少。姦濫日生。諸使則課利少而羨餘多。侵削日甚。舉一知十。可勝言哉。況今方域未甚安。邊陲未甚靜。水旱之災不戒。兵戎之動無期。然則爲宰相者。得不圖將來之安。補既往之敗乎。若相公用天下之目觀而救之。夫豈無最遠之見乎。用天下之心圖而濟之。夫豈無最長之策乎。策之最長者。見之最遠者。在相公鑒而取之。誠而行之而已。取之也。行之也。今其時乎。爲時之用大矣哉。古者聖賢有其才。無其位。不能行其道也。有其才。有其位。無其時。亦不能行其道也。必待有其才。有其位。有其時。然後能行其道焉。某竊見相公曩時制策。對中論風化澆淳之源。明天人交感之道。陳兵災救療之術。可謂有其才矣。又伏見今月十一日制詞云。其代予言。允屬良弼。必能形四方之風。成天下之務。可謂有其時矣。今相公有其才。有其位。有其時。則行

道由己而由道乎哉。某又聞一往而不可追者時也。故聖賢甚惜焉。方今拭天下之目以觀主上之作爲也。側天下之耳以聽相公之舉措也。如此則相公出一言不終日而必聞於朝野。主上發一令不浹辰而必達於華夷。蓋主上輯百辟和萬姓服四夷之時在於此時矣。相公充人望代天工報國之恩正在於今日矣。或者曰君臣之道至大也。可以漸合。不可以速合也。天下之化至大也。可以漸行。不可以速行也。賢人之事業至大也。行之可以枉尺而直尋也。某以爲殆不然矣。夫時之變事之宜其間不容息也。先之則太過。後之則不及。故時未至。聖賢不進而求。時既來。聖賢不退而讓。蓋得之則不啻乎事半而功倍也。失之則不啻乎事倍而功半也。嗟乎。或者徒知漸合其道而不知啓沃之時。失於漸中矣。徒知漸行其化而不知變理之時。失於漸中矣。徒知枉尺而直尋而不知易失於時。則難生於漸中。雖枉尋不能直尺矣。近者宰相道不行。化不成。事業不光明。率由乎有志於漸矣。請以前事明之。某嘗聞太宗顧謂羣臣曰。善人爲邦百年。然後能勝殘去殺。當今大亂之後。將求致理。寧可造次而望乎。魏文貞曰。不然。夫亂後易理。猶飢人易食也。若聖哲施化。人應如響。期月而可信。不爲難。三年成功。猶謂其晚。太宗深納其言。時封德彝輩共非之曰。不可。三代以後。人漸澆訛。皆欲理而不能。豈能理而不欲。魏徵書生。不識時務。信其虛說。必亂國家。於是太宗卒從文貞之言。力行不倦。三數年間。天下大安。戎狄內附。太宗曰。惜哉。不得使封德彝見之。斯則得其時行其道。不取於漸之明效也。況今日之天下。豈弊於武德之天下乎。相公之事業。豈後於文貞之事業乎。在於疾行而已矣。所以主上踐祚未及十日。而寵命加於相公者。惜國家之時也。相公受命未及十日。而某獻於執事者。惜相公之時也。夫欲行大道。樹大功。貴其速也。蓋明年不如今年。明日

不如今日矣。故孔子曰：日月逝矣，歲不我與。此言時之難得而易失也。伏惟相公惜其時之易也而不失焉。慮其漸之難也而不取焉。抑又聞濟時者道也。行道者權也。扶權者寵也。故得其位，不可一日無其權。得其權，不可一日無其寵。然則取權有術也。求寵有方也。蓋竭其力以舉職，而權必自歸。忘其身以徇公，而寵必自至。權歸寵至，然後能行其道焉。伏惟相公詳之而不忽也。抑又聞不棄死馬之骨者，然後良驥可得也。不棄狂夫之言者，然後嘉謨可聞也。苟某管見之中有可取者，俯而取之。苟芻言之中有可採者，俛而採之。則知之者必曰：如某之見，猶且不棄。況愈於某之徒歟。則天下通情達識之士，得不比肩而至乎。聞之者必曰：如某之言，猶且不棄。況愈於某之徒歟。則天下審諤敢言之士，得不繼踵而來乎。伏惟相公試垂意焉。則天下之士幸甚。某遊長安僅十年矣，足不踐相公之門，目不識相公之面，名不聞相公之耳。相公視某何爲者哉。豈非介者耶。狷者耶。今一旦卒然以數千言塵黷執事者，又何爲哉。實不自揆，欲以區區之聞見裨相公聰明萬分之一分也。又欲以濟天下顛頓之人死命萬分之一分也。相公以爲如何。

卷二十八

與元九書

月日居易白。微之足下。自足下謫江陵。至于今。凡枉贈答詩。僅百篇。每詩來。或辱序。或辱書。冠于卷首。皆所以陳古今歌詩之義。且自敘爲文因緣與年月之遠近也。僕旣愛足下詩。又諭足下此意。常欲承答來。

旨。粗論歌詩大端。并自述爲文之意。總爲一書。致足下前。累歲已來。牽故少暇。間有容隙。或欲爲之。又自思所陳。亦無出足下之見。臨紙復罷者數四。卒不能成就其志。以至於今。今俟罪潯陽。除盥櫛食寢外。無餘事。因覽足下去通州日所留新舊文二十六軸。開卷得意。忽如會面。心所畜者。便欲快言。往往自疑。不知相去萬里也。旣而憤悱之氣。思有所洩。遂追前就志。勉爲此書。足下幸試爲僕留意一省。夫文尙矣。三才各有文。天之文三光首之。地之文五材首之。人之文六經首之。就六經言。詩又首之。何者。聖人感人心而天下和平。感人心者莫先乎情。莫始乎言。莫切乎聲。莫深乎義。詩者根情苗言華聲實義。上自賢聖。下至愚騷。微及豚魚。幽及鬼神。羣分而氣同。形異而情一。未有聲入而不應。情交而不感者。聖人知其然。因其言。經之以六義。緣其聲。緯之以五音。音有韻。義有類。韻協則言順。言順則聲易入。類舉則情見。情見則感易交。於是乎孕大含深。貫微洞密。上下通而一氣。泰。憂樂合而百志熙。五帝三皇所以直道而行。垂拱而理者。揭此以爲大柄。決此以爲大寶也。故聞元首明。股肱良之歌。則知虞道昌矣。聞五子洛汭之歌。則知夏政荒矣。言者無罪。聞者足戒。言者聞者莫不兩盡其心焉。洎周衰秦興。採詩官廢。上不以詩補察時政。下不以歌洩導人情。乃至於詔成之風動。救失之道缺。於時六義始凋矣。國風變爲騷辭。五言始於蘇李。蘇李騷人。皆不遇者。各繫其志。發而爲文。故河梁之句止於傷別。澤畔之吟歸於怨思。彷徨抑鬱。不暇及他耳。然去詩未遠。梗概尙存。故興離別。則引雙鳧一鴈爲喻。諷君子小人。則引香草惡鳥爲比。雖義類不具。猶得風人之什二三焉。於時六義始缺矣。晉宋已還。得者蓋寡。以康樂之奧博。多溺於山水。以淵明之高古。偏放於田園。江鮑之流。又狹於此。如梁鴻五噫之例者。百無一二焉。於時六義寔微矣。陵夷矣。至

於梁陳間。率不過嘲風雪。弄花草而已。噫。風雪花草之物。三百篇中豈捨之乎。顧所用何如耳。設如北風其涼。假風以刺威虐也。雨雪霏霏。因雪以愍征役也。棠棣之華。感華以諷兄弟也。采采芣苢。美草以樂有子也。皆興發於此而義歸於彼。反是者可乎哉。然則餘霞散成綺。澄江淨如練。離花先委露。別葉乍辭風之什。麗則麗矣。吾不知其所諷焉。故僕所謂嘲風雪。弄花草而已。於時六義盡去矣。唐興二百年。其間詩人不可勝數。所可舉者。陳子昂有感遇詩二十首。鮑防有感興詩十五首。又詩之豪者。世稱李杜。李之作才矣。奇矣。人不逮矣。索其風雅比興十無一焉。杜詩最多。可傳者千餘首。至於貫穿今古。覲縷格律。盡工盡善。又過於李。然撮其新安吏。石壕吏。潼關吏。塞蘆子。留花門之章。朱門酒肉臭。路有凍死骨之句。亦不過三四首。杜尚如此。況不逮杜者乎。僕常痛詩道崩壞。忽忽憤發。或食輟哺。夜輟寢。不量才力。欲扶起之。嗟乎。事有大謬者。又不可一二而言。然亦不能不粗陳於左右。僕始生六七月時。乳母抱弄於書屏下。有指無字之字示僕者。僕雖口未能言。心已默識。後有問此二字者。雖百十其試。而指之不差。則僕宿習之緣。已在文字中矣。及五六歲。便學爲詩。九歲諳識聲韻。十五六始知有進士。苦節讀書。二十已來。晝課賦。夜課書。間又課詩。不遑寢息矣。以至於口舌成瘡。手肘成胝。既壯而膚革不豐盈。未老而齒髮早衰白。瞥然如飛蠅垂珠在眸子中也。動以萬數。蓋以苦學力文所致。又自悲矣。家貧多故。二十七方從鄉試。既第之後。雖專於科試。亦不廢詩。及授校書郎時。已盈三四百首。或出示交友。如足下輩。見皆謂之工。其實未窺作者之域耳。自登朝來。年齒漸長。閱事漸多。每與人言。多詢時務。每讀書史。多求理道。始知文章合爲時而著。歌詩合爲事而作。是時皇帝初卽位。宰府有正人。屢降璽書。訪人急病。僕當此日。擢在翰林。身

是諫官。月請諫紙啓奏之外。有可以救濟人病。裨補時闕。而難於指言者。輒詠歌之。欲稍稍遞進聞於上。上以廣宸聰。副憂勤。次以酬恩獎。塞言責。下以復吾平生之志。豈圖志未就而悔已生。言未聞而謗已成矣。又請爲左右終言之。凡聞僕賀雨詩。而衆口籍籍。已謂非宜矣。聞僕哭孔戡詩。衆面脈脈。盡不悅矣。聞秦中吟。則權豪貴近者。相目而變色矣。聞樂遊園寄足下詩。則執政柄者。扼腕矣。聞宿紫閣村詩。則握軍要者。切齒矣。大率如此。不可偏舉。不相與者。號爲沽名。號爲詆訐。號爲訕謗。苟相與者。則如牛僧孺之戒焉。乃至骨肉妻孥。皆以我爲非也。其不我非者。舉世不過三兩人。有鄧魴者。見僕詩而喜。無何而魴死。有唐衢者。見僕詩而泣。未幾而衢死。其餘則足下。足下又十年來困躓若此。嗚呼。豈六義四始之風。天將破壞。不可支持耶。抑又不知天之意。不欲使下人之病苦聞於上耶。不然。何有志於詩者。不利若此之甚也。然僕又自思。關東一男子耳。除讀書屬文外。其他懵然無知。乃至書畫棋博。可以接羣居之歡者。一無通曉。卽其愚拙可知矣。初應進士時。中朝無總麻之親。達官無半面之舊。策蹇步於利足之途。張空拳於戰文之場。十年之間。三登科第。名入衆耳。迹升清貫。出交賢俊。入侍冕旒。始得名於文章。終得罪於文章。亦其宜也。日者又聞親友間說禮吏部舉選人。多以僕私試賦判傳爲準的。其餘詩句。亦往往在人口中。僕慙然自愧。不之信也。及再來長安。又聞有軍使高霞寓者。欲娉倡妓。妓大誇曰。我誦得白學士長恨歌。豈同他妓哉。由是增價。又足下書云。到通州日。見江館柱間有題僕詩者。復何人哉。又昨過漢南日。適遇主人集衆樂娛他賓。諸妓見僕來。指而相顧曰。此是秦中吟長恨歌主耳。自長安抵江西三四千里。凡鄉校佛寺逆旅行舟之中。往往有題僕詩者。士庶僧徒孀婦處女之口。每有詠僕詩者。此誠雕蟲之戲。不足

爲多。然今時俗所重。正在此耳。雖前賢如淵雲者。前輩如李杜者。亦未能忘情於其間哉。古人云。名者公器。不可以多取。僕是何者。竊時之名已多。既竊時名。又欲竊時之富貴。使己爲造物者。肯兼與之乎。今之述窮理固然也。況詩人多蹇。如陳子昂杜甫。各授一拾遺而迺剝至死。李白孟浩然輩。不及一命。窮悴終身。近日孟郊六十。終試協律。張籍五十。未離一太祝。彼何人哉。彼何人哉。況僕之才。又不逮彼。今雖謫佐遠郡。而官品至第五。月俸四五萬。寒有衣。飢有食。給身之外。施及家人。亦可謂不負白氏之子矣。微之微之。勿念我哉。僕數月來。檢討囊裘中。得新舊詩。各以類分。分爲卷。首自拾遺來。凡所適。所感。關於美刺興比者。又自武德訖元和。因事立題。題爲新樂府者。共一百五十者。謂之諷諭詩。又或退公獨處。或移病閑居。知足保和。吟詠情性者。一百首。謂之閑適詩。又有事物牽於外。情理動於內。隨感遇而形於歎詠者。一百首。謂之感傷詩。又有五言。七言。長句。絕句。自一百韻至兩韻者。四百餘首。謂之雜律詩。凡爲十五卷。約八百首。異時相見。當盡致於執事。微之。古人云。窮則獨善其身。達則兼濟天下。僕雖不肖。常師此語。大丈夫所守者道。所待者時。時之來也。爲雲龍。爲風鵬。勃然突然。陳力以出。時之不來也。爲霧豹。爲冥鴻。寂兮寥兮。奉身而退。進退出處。何往而不自得哉。故僕志在兼濟。行在獨善。奉而始終之。則爲道。言而發明之。則爲詩。謂之諷諭詩。兼濟之志也。謂之閑適詩。獨善之義也。故覽僕詩。知僕之道焉。其餘雜律詩。或誘於一時一物。發於一笑一吟。率然成章。非平生所尚者。但以親朋合散之際。取其釋恨佐懽。今銓次之間。未能刪去。他時有爲我編集斯文者。略之可也。微之。夫貴耳賤目。榮古陋今。人之大情也。僕不能遠徵古舊。如近歲章蘇州歌行才麗之外。頗近興諷。其五言詩。又高雅閑澹。自成一家人之體。今之秉筆者。誰能及之。

然當蘇州在時。人亦未甚愛重。必待身後。然人貴之。今僕之詩。人所愛者。悉不過雜律詩與長恨歌已下耳。時之所重。僕之所輕。至於諷諭者。意激而言質。閑適者。思澹而詞迂。以質合迂。宜人之不愛也。今所愛者。並世而生。獨足下耳。然千百年後。安知復無如足下者。出而知愛我詩哉。故自八九年來。與足下小通。則以詩相戒。小窮則以詩相勉。索居則以詩相慰。同處則以詩相娛。知吾罪。吾率以詩也。如今年春。遊城南時。與足下馬上相戲。因各誦新豔小律。不雜他篇。自皇子陂歸昭國里。迭吟遞唱。不絕聲者二十里餘。樊李在傍。無所措口。知我者以爲詩仙。不知我者以爲詩魔。何則。勞心靈。役聲氣。連朝接夕。不自知其苦。非魔而何。偶同人當美景。或花時宴罷。或月夜酒酣。一詠一吟。不知老之將至。雖驂鸞鶴。遊蓬瀛者。之適無以加於此焉。又非仙而何。微之微之。此吾所以與足下外形骸。脫蹤跡。傲軒鼎。輕人寰者。又以此也。當此之時。足下興有餘力。且欲與僕悉索還往中詩。取其尤長者。如張十八古樂府。李二十新歌行。盧楊二祕書律詩。竇七元八絕句。博搜精掇。編而次之。號元白往還詩集。衆君子得擬議於此者。莫不踊躍欣喜。以爲盛事。嗟乎。言未終而足下左轉。不數月而僕又繼行。心期索然。何日成就。又可爲之歎息矣。又僕嘗語足下。凡人爲文。私於自是。不忍於割截。或失於繁多。其間妍媸益又自惑。必待交友有公鑒無姑息者。討論而削奪之。然後繁簡當否。得其中矣。况僕與足下爲文。尤患其多。已尙病之。况他人乎。今且各纂詩筆。粗爲卷第。待與足下相見日。各出所有。終前志焉。又不知相遇是何年。相見在何地。溘然而至。則如之何。微之微之。知我心哉。潯陽臘月。江風苦寒。歲暮鮮歡。夜長無睡。引筆鋪紙。悄然燈前。有念則書。言無次第。勿以繁雜爲倦。且以代一夕之話也。微之微之。知我心哉。樂天再拜。

答戶部崔侍郎書

侍郎院長閣下。戶部牒中奉八月十七日書。具承康寧。喜與抃會。并別親手翰。訪敍綢繆。何眷好勤勤。若此之不替也。幸甚幸甚。首垂問以鄙況。不足云。蓋默默兀兀。委順任化而已。次垂問以體氣。除舊目疾外。雖不甚健。亦幸無急病矣。次垂問以月俸。月俸雖不多。然量入以爲用。亦不至凍餒矣。又垂問以舍弟渠從事東川。近得書。且知無恙矣。終垂問以心地。此最要者。輒梗概言之。頃與閣下在禁中日。每視草之暇。匡牀接枕。言不及他。常以南宗心要互相誘導。別來閑獨。隨分增修。比於曩時。亦似有得。得中無得。無可寄言。來書云。粗示可乎。斯不可也。又知兵部李尙書同在南宮。錢蕭二舍人移官閑秩。退朝之暇。數獲晤言。每話舊遊。輒蒙見念。此蓋君子久要之心。不爲榮頓合散增減耳。而不佞者又何幸焉。然自到潯陽。忽已周歲。外物盡遺。中心甚虛。雖賦命之間。則有厚薄。而忘懷之後。亦無窮通。用此道推。頽然自足。又或杜門隱几。塊然自居。木形灰心。動逾旬月。當此之際。又不知居在何地。身是何人。雖鵬鳥集於前。枯柳生於肘。不能動其心也。而況進退榮辱之累耶。又思頃者。接確論時。走嘗有言。薦於執事云。心與迹多相戾。道與名不兩立。苟有志於道者。若不幸於外。是幸於內。猥蒙歎賞。猶憶之乎。今之身心。或近是矣。退思此語。撫省初心。求仁得仁。又何不足之有也。前月中長兄從宿州來。又孤幼弟姪六七人。皆自遠至。日有糲食。歲有麤衣。飢寒獲同。骨肉相保。此亦默默委順之外。益自安也。況廬山在前。九江在左。出門是滄浪水。舉頭見香鑪峯。東西二林。時時一往。至如瀑水怪石。桂風杉月。平生所愛者。盡在其中。此又兀兀任化之外。益自適也。今日之心。誠不待此而後安適。況兼之者乎。此鄙人所以安又安。適又適。而不知命之窮。老之

至也。院長公望日重。啓沃非遙。仰惟勉樹勳名。勿以鄙劣爲念。

與濟法師書

月日弟子太原白居易白。濟上人侍左。昨者頂謁時。不以愚蒙言及佛法。或未了者。許重討論。今經典開未論者。其義有二。欲面問答。恐彼此卒卒。語言不盡。故粗形於文字。願詳覽之。敬佇報章。以開未悟。所望所望。佛以無上大慧觀一切衆生。知其根性大小不等。而以方便智說方便法。故爲闡提說十善法。爲小乘說四諦法。爲中乘說十二因緣法。爲大乘說六波羅蜜法。皆對病根投以良藥。此蓋方便教中不易之典也。何者。若爲小乘人說大乘法。心則狂亂。狐疑不信。所謂無以大海內於牛迹也。若爲大乘人說小乘法。是以穢食置於寶器。所謂彼自無創。勿傷之也。故維摩經摠其義云。爲大醫王。應病與藥。又首楞嚴三昧經云。不先思量而說何法。隨其所應而爲說法。正是此義耳。猶恐說法者不隨人之根性也。故又法華經戒云。若但讚佛乘。衆生沒在罪苦。不能信是法。破法不信故。如此。非獨慮說者不能救病。亦懼聞者不信。沒入罪苦也。則佛之付囑。豈不丁寧也。何則。法王經云。若定根基。爲小乘人說小乘法。爲闡提人說闡提法。是斷佛性。是滅佛身。是說法人當歷百千萬劫墮諸地獄。縱佛出世。猶未得出。若生人中。缺唇無舌。獲如是報。何以故。衆生之性。卽是法性。從本已來。無有增減。云何於中分別病藥。又云。於諸法中。若說高下。卽名邪說。其口當破。其舌當裂。何以故。一切衆生。心垢同一垢。心淨同一淨。衆生若病。應同一病。衆生須藥。應同一藥。若說多法。卽名顛倒。何以故。爲妄分別。拆善惡法。破一切法。故隨機說法。斷佛道。故此又了然不壞之義也。又金剛經云。是法平等。無有高下。是名阿耨多羅三藐三菩提。又金剛三昧經云。皆

以一味道終。不以小乘無有諸雜味。猶如一雨潤。據此後三經。則與前三經義甚相戾也。其故何哉。若云依維摩詰謂富樓那云。先當入定。觀此人心。然後說法。又云不觀人根。不應說法。夫以富樓那之通慧。又親奉如來爲大弟子。尙未能觀知人心。況後五百歲末法中弟子。豈盡能觀知人心而後說法乎。設使觀知人心。若彼發小乘心而爲說大乘法可乎。若未能觀彼心而率己意說又可乎。既未能觀與默然不說又可乎。若云依義不依語。則上六經之義互相違反。其將孰依乎。若云依了義經。則三世諸佛一切善法皆從此六經出。孰名爲不了義經乎。況諸經中與維摩法華首楞嚴之說同者非一也。與法王金剛金剛三昧之說同者亦非一也。不可遍舉。故於二義中各舉三經。此六經皆上人常所講讀者。今故引以爲問。必有甚深之旨焉。今且有人忽問法於上人。上人或能觀知其心。或未能觀知其心。將應病與藥而爲說耶。將同一病一藥而爲說耶。若應病與藥。是有高下。是有雜味。卽反法王等三經之義。豈徒反其義。又獲如上所說之罪報矣。若同一病一藥爲說。必當說大乘。大乘卽佛乘也。若讚佛乘。且不隨應心。且不救病。卽反維摩第三經之義。豈徒反其義。又使衆生沒在罪苦矣。六者皆如來說。如來是真語。實語。不誑語。不異語者。今隨此則反彼。順彼則逆此。設有問者。上人其將何法以對焉。此其未論者一也。又五蘊者。色。受。想。行。識是也。十二因緣者。無明緣。行。行緣。識。識緣。名。緣。色。色緣。六入。六入緣。觸。觸緣。受。受緣。愛。愛緣。取。緣。有。有緣。生。生緣。老。死。病。苦。憂。悲。苦。惱是也。夫五陰十二因緣。蓋一法也。蓋一義也。略言之則爲五。詳言之則爲十二。雖名數多少或殊。其於倫次轉遷。合同條貫。今五蘊中則色。受。想。行。識相次。而十二緣中則行。識。色。入。觸。受。相緣。一則色在行前。一則色次行後。正序之既不類。逆倫之又不同。若謂佛次第而言。則

不應有此雜亂。若謂佛偶然而說。則不當名爲因緣。前後不倫。其義安在。此其未諭者二也。上人耆年大德。後學宗師。就出家中。又以說法而作佛事。必能研精二義。合而通之。仍望指陳著於翰墨。蓋欲藏於篋笥。永永不忘也。其餘疑義。亦續咨問。居易稽首。

與元微之書

四月十日夜。樂天白微之。微之不見足下面已三年矣。不得足下書。欲二年矣。人生幾何。離闊如此。況以膠漆之心。置於胡越之身。進不得相合。退不能相忘。牽轡乖隔。各欲白首。微之。微之。如何如何。天實爲之。謂之奈何。僕初到潯陽時。有熊孺登來。得足下前年病甚時一札。上報疾狀。次敘病心。終論平生交分。且云危憊之際。不暇及他。唯收數帙文章。封題其上。曰他日送達白二十二郎。便請以代書。悲哉。微之於我也。其若是乎。又睹所寄聞僕左降詩云。殘燈無燄影幢幢。此夕聞君謫九江。垂死病中驚起坐。聞風吹面入寒窗。此句他人尙不可聞。況僕心哉。至今每吟。猶惻惻耳。且置是事。略敘近懷。僕自到九江。已涉三載。形骸且健。方寸甚安。下至家人。幸皆無恙。長兄去夏自徐州至。又有諸院孤小弟妹六七八人。提挈同來。頃所牽念者。今悉置在目前。得同寒煖。飢飽。此一秦也。江地風候稍涼。地少瘴癘。乃至蛇虺蚊蚋。雖有甚稀。湓魚頗肥。江酒極美。其餘食物多類北地。僕門內之口。雖不少。司馬之俸。雖不多。量入儉用。亦可自給。身衣口食。且免求人。此二秦也。僕去年秋始遊廬山。到東西二林間。香鑪峯下。見雲水泉石。勝絕第一。愛不能捨。因置草堂。前有喬松十數株。修竹千餘竿。青蘿爲牆。援白石爲橋道。流水周於舍下。飛泉落於簷間。紅榴白蓮。羅生池砌。大抵若是。不能殫記。每一獨往。動彌旬日。平生所好者。盡在其中。不唯忘歸。可以終

老。此三秦也。計足下久不得僕書。必加憂望。今故錄三秦。以先奉報。其餘事況。條寫如後云云。微之微之。作此書夜。正在草堂中山窗下。信手把筆。隨意亂書。封題之時。不覺欲曙。舉頭但見山僧一兩人。或坐或睡。又聞山猿谷鳥哀鳴啾啾。平生故人。去我萬里。瞥然塵念。此際暫生。餘習所牽。便成三韻。云。憶昔封書與君夜。金鑾殿後欲明天。今夜封書在何處。廬山菴裏曉燈前。籠烏檻猿俱未死。人間相見是何年。微之微之。此夕我心。君知之乎。樂天頓首。

荔枝圖序

荔枝生巴峽間。樹形團團如帷蓋。葉如桂。冬青華如橘。春榮實如丹。夏熟朶如葡萄。核如枇杷。殼如紅繒。膜如紫綃。瓤肉瑩白如冰雪。漿液甘酸如醴酪。大略如彼。其實過之。若離本枝。一日而色變。二日而香變。三日而味變。四五日外。色香味盡去矣。元和十五年夏。南賓守樂天命工吏圖而書之。蓋爲不識者與識而不及一二三日者云。

卷二十九

補逸書

湯征諸侯。葛伯不祀。湯始征之。作湯征。葛伯荒怠。敗禮廢祀。湯專征諸侯。肇徂征之。湯若曰。格爾三事之人。逮於有衆。啓乃心。正乃容。明聽予言。咨爾先格王。有彝訓曰。祿無常荷。荷於仁。福無常享。享於敬。惠乃道。保厥邦。覆乃德。殄厥世。惟葛伯反易天道。怠棄邦本。虐於民。慢於神。惟社稷宗廟罔克尊奉。暨山川

鬼神亦廢禮祀。告曰：罔犧牲以供俎羞。予昇厥牛羊。乃既於盜食。曰：罔黍稷以奉粢盛。予佑厥稼穡。乃困於仇餉。今爾衆曰：萬罪其如予聞。曰：爲邦者祇奉明神。撫綏蒸民。二者克備。尙克保厥家邦。吁！廢於祀。神震怒。肆於虐。民離心。頃繩契以降暨於百代。神怒民叛。而不顛隳者。匪我攸聞。小子履。以涼德。欽奉天威。肇征有葛。咨爾有衆。克濟厥功。其有倣師徒。戒車乘。敬君事者。有明賞。其有罔率職。罔勩力。不恭命者。有常刑。明賞不僭。常刑無赦。嗚呼！朕告汝衆。君子監於茲。欽哉懋哉。罰及乃躬。不可悔。

箴言 并序

貞元十有五年。天子命中書舍人渤海公領禮部貢舉事。越明年春。居易以進士舉。一上登第。洎翌日。至於旬。時伏念。固陋懼不克副公之選。充王之賓。乃自陳戒於德。作箴言。

曰。我聞古君子。人疾沒世。名不稱。恥邦有道。貧且賤。今我生休明代。二十有六年。乃策名。名既聞於君。乃干祿。祿將及於親。升聞逮養。繫公之德。公之德之。死矢報之。報之義。靡他。惟勵乃志。遠乃猷。俾德日修。道日就。是報於公。匪報於公。是光於躬。匪光於躬。是華於邦。吁。其念哉。其勗哉。庶俾行中規。文中倫。學惟時。習罔怠。棄位惟馴。致罔躁求。惟一德。五常陶甄於內。惟四科六藝。斧藻於外。若御輿。既勒銜策。乃克駿奔。若治金。既砥淬礪。乃克利用。無曰擢甲科。名既立。而自廣自滿。尙念山九仞。虧於一簣。無曰登一第。位其達。而自欺自卑。尙念行千里。始於足下。嗚呼。我無監於止水。當監於斯文。庶克欽厥止。慎厥終。自顧於箴言。無作身之羞。公之羞。

中和節頌 并序

此已下文並是未及第前作

乾清而四時行。坤寧而萬物生。聖人則之。無爲而無不爲。神唐御宇之九葉。皇帝握符之十載。夷夏咸寧。君臣交欣。有詔始以二月上巳日爲中和節。自上下下。雷解風動。翌日而頒乎四嶽。浹辰而達乎八荒。於戲。中和之時義遠矣哉。惟唐之興。我神堯子兆人而基皇德。太宗家六合而開帝功。玄宗執象而薰仁壽之風。代宗垂拱而阜富庶之俗。烏奕乎赫赫煌煌。八聖重光。以至於我皇。我皇運玄樞。陶淳精。治定而化成。嗣皇極於穆清。納黔首於升平。於時數惟上元。歲惟仲春。皇帝穆然居青陽太廟。命有司考時令。以爲安萌牙。養幼少。緩刑獄。布慶賜。蓋百王常行之道。未足以啓迪天地之化。發揮祖宗之德。乃命初吉肇爲中和。中者揆三陽之中。和者酌二氣之和。其爲稱也大矣。非至聖疇能建之。於是謀始要終。循義討源。於以九八節而七六氣。排重陽而拉上巳。煦元氣於厚壤。則幽蟄蘇而句萌達。噫。和風於窮荒。則桀鷲化而獮俗淳。垂萬祀以摠無窮。被四表以示大同。於時兩儀三辰。貞明綱縉。千品萬彙。熙熙忻忻。絲是文武百辟。僉拜手稽首而颺言曰。大哉睿德。合於玄造。又曰。昔在唐堯。敬授人時。垂於典謨。降及周文。在鎬飲酒。列於雅頌。斯蓋欽若四序。凱樂一方而已。未若肇建令節。混同天下。澤鋪動植。慶浹華夷。若斯之盛歟。蓋聖人之作事。必導達交泰。幽贊亭育。與元和合其運。與眞宰同其功。不休哉。其至矣夫。賤臣居易忝濡文明之化。就寶貢之列。輒敢美盛德。頌成功。獻中和頌一章。附於唐雅之末。頌曰。

權輿胚渾。玄黃旣分。煦嫗綱縉。肇生蒸民。天命聖神。是爲大人。大人淳淳。爲天下君。巍巍我唐。穆穆我皇。纂承九葉。照臨八方。四維載張。兩曜重光。齷齪唐虞。越越義皇。乘時有作。煥乎文章。乃建貞元。以正乾坤。乃紀吉辰。以殷仲春。吉辰伊何。號爲中和。和維大和。中維大中。以暢中氣。以播和風。萌芽昆蟲。昭蘇有融。

如幹玄和如運神功於戲德治道豐萬邦來同微臣作頌垂裕無窮

晉諡恭世子議

晉侯以驪姬之惑殺太子申生或謂申生得殺身成仁之道是以晉人諡爲恭世子載在方冊古今以爲然居易獨以爲不然也大凡恭之義有三以孝保身子之恭以正承命臣之恭以道守嗣君之恭若棄嗣以非禮不可謂道受命於非義不可謂正殺身以非罪不可謂孝三者率非恭也申生有焉而諡曰恭不知其可若垂來代以爲訓戒居易懼後之臣子有失大義守小節者將奔走之將欲商榷敢徵義類在昔虞舜父頑母嚚舜既克諧瞽亦允若申生父之昏姬之惡誠宜率子道以幾諫感君心以至誠雖申生之孝不侔於舜而獻公之頑亦不逮於瞽蓋以蒸蒸之父俾不格於姦乎故咎之始形則齋栗祗載爲虞舜可也若不能及禍之將兆則讓位去國爲吳太伯可也若又不能及難之既作則全身遠害爲公子重耳可也三失無一得於是乎致身於不義不祇陷父於不德不慈負罪被名以至於死臣子之道不其惑歟夫以堯之聖書美曰允恭舜之孝書美曰溫恭今以申生之失道亦謂曰恭庸可稱乎周之衰也楚子以霸王之器奄有荆蠻光啓土宇赫赫楚國由之而興諡之爲恭猶曰薄德今申生徇其死不顧其義輕其身不圖其君俾死之後弑三君殺十有五臣實啓禍先大亂晉國則楚之得也如彼申生之失也若此異德同諡無乃不可乎左氏修魯史受經於仲尼蓋仲尼之志丘明從而明之無善惡無大小莫不微婉而發揮焉至於申生之死也之諡也略而無譏何其謬哉何以覈諸且仲尼修春秋明則有凡例幽則有微旨其有君不君臣不臣父不父子不子者率書名以貶之故書曰晉侯殺其太子申生不言晉人而書晉

侯。且名太子者。蓋明晉侯不道。且罪申生陷君父於不義也。以微旨考之。則仲尼明貶可知矣。以凡例推之。則左氏之闕文可知矣。嗚呼。先王之制諡。豈容易哉。蓋善惡始終必褒貶於一字。所以彰明往者。勸沮來者。故君子於其諡。無所苟而已矣。繇是而言。則恭世子之諡。不亦輕乎。不亦輕乎。

漢將李陵論

論曰。忠孝智勇四者爲臣爲子之大寶也。故古之君子奉以周旋。苟一失之。是非人臣人子矣。漢李陵策名上將。出討匈奴。竊謂不死於王事。非忠。生降於戎虜。非勇。棄前功。非智。召後禍。非孝。四者無一可。而遂亡其宗。哀哉。予覽史記。漢書。皆無明譏。竊甚惑之。司馬遷雖以陵獲罪。而無譏可乎。班孟堅亦從而無譏。又可乎。按禮云。謀人之軍。師敗則死之。故敗而死者。是其所也。春秋所以美狼臆者。爲能獲其死所。而陵獲所不死。得無譏焉。觀其始以步卒深入虜庭。而能以寡擊衆。以勞破逸。再接再捷。功孰大焉。及乎兵盡力殫。摧鋒敗績。不能死戰。卒就生降。噫。墜君命。挫國威。不可以言忠。屈身於夷狄。束手爲俘虜。不可以言勇。喪戰勳於前。墜家聲於後。不可以言智。罪追於躬。禍移於母。不可以言孝。而引范蠡曹沫爲比。又何謬歟。且會稽之恥。蠡非其罪。魯國之差。沫必能報。所以二子不死也。而陵苟免其微軀。受制於強虜。雖有區區之意。亦奚爲哉。夫吳齊者。越魯之敵國。匈奴者。漢之外臣。俾大漢之將。爲單于之擒。是長寇讎。辱國家甚矣。況二子雖不死。無陵生降之名。二子苟生降。無陵及親之禍。酌其本末。事不相侔。而陵竊慕之。是大失臣子之義也。觀陵答子卿之書。意者但患漢之不知己。而不自內省其始終焉。何者。與其欲刺心自明。刎頸見志。曷若効節致命。取信於君。與其痛母悼妻。尤君怨國。曷若忘身守死。而紓禍於親焉。或曰。武帝

不能明察。下聽流言。遽加厚誅。豈非負德。答曰。設使陵不苟其生。能繼以死。則必賞延於世。刑不加親。戰功足以冠當時。壯節足以垂後代。忠孝智勇四者立而死且不朽矣。何流言之能及哉。嗚呼。予聞之。古人云。人各有一死。死或重於泰山。生或輕於鴻毛。若死重於義。則視之如泰山也。若義重於死。則視之如鴻毛也。故非其義。君子不輕其生。得其所。君子不愛其死。惜哉。陵之不死也。失君子之道焉。故隴西士大夫以李氏爲愧。不其然乎。不其然乎。

太原白氏家狀二道

故鞏縣令白府君事狀

白氏。辛姓。楚公族也。楚熊居太子建。奔鄭。建之子勝。居於吳楚間。號白公。因氏焉。楚殺白公。其子奔秦。代爲名將。乙丙已降是也。裔孫曰起。有大功於秦。封武安君。後非其罪。賜死杜郵。秦人憐之。立祠廟於咸陽。至今存焉。及始皇思武安之功。封其子仲於大原。子孫因家焉。故今爲大原人。自武安以下。凡二十七代。至府君高祖諱建。北齊五兵尙書。贈司空。曾祖諱士通。皇朝利州都督。祖諱志善。朝散大夫。尙衣奉御。父諱溫。朝請大夫。檢校都官郎中。公諱鍾。字口鍾。都官郎中第六子。幼好學。善屬文。尤工五言詩。有集十卷。年十七。明經及第。解褐。授鹿邑縣尉。洛陽縣主簿。酸棗縣令。理酸棗有善政。本道節度使令狐章知而重之。秩滿。奏授殿中侍御史。內供奉。賜緋魚袋。充滑臺節度參謀。軍府之要多咨度焉。居歲餘。公嘗規章之失。章不聽。公因留一書移章。不辭而去。明年。遷授河南府鞏縣令。在任三考。自鹿邑至鞏縣。皆以清直靜理聞於一時。公爲人沈厚和易。寡言多可。至於涉是非。關邪正者。辨而守之。則確乎其不可拔也。大曆八

年五月三日遇疾。歿於長安。春秋六十八。以其年權厝於邽縣下邑里。夫人河東薛氏。夫人之父諱傲。河南縣尉。大曆十二年六月十九日歿於新鄭縣私第。享年七十。以其年權窆厝於新鄭縣臨洧里。公有子五人。長子諱季庚。襄州別駕。事具後狀。次諱季殷。徐州沛縣令。次諱季軫。許州許昌縣令。次諱季寧。河南府參軍。次諱季平。鄉貢進士。元和六年十月八日。孫居易等始發護靈櫬。遷葬於下邽縣北義津鄉北原。而合祔焉。謹狀。

襄州別駕府君事狀

公諱季庚。字□□。鞏縣府君之長子。天寶末。明經出身。解褐。授蕭山縣尉。歷左武衛兵曹參軍。宋州司戶參軍。建中元年。授彭城縣令。時徐州爲東平所管。屬本道節度使反。反之狀。先以勝兵屯埇口。絕汴河運路。然後謀東闕江淮。朝廷憂虞。計未有出。公與本州刺史李洧潛謀。以徐州及埇口城歸國。反拒東平。東平遣驍將信都崇敬石隱金等。率勁卒二萬攻徐州。徐州無兵。公收合吏民得千餘人。與李洧堅守城池。親當矢石。晝夜攻拒。凡四十二日。而諸道救兵方至。旣而賊徒潰。運路通。首挫逆謀。不敢東顧。繇是徐州一郡七邑及埇口等三城。到於今。訖不隸東平者。實李洧與公之力也。德宗嘉之。命公自朝散郎超授朝散大夫。自彭城令擢拜本州別駕。賜緋魚袋。仍充徐泗觀察判官。故其制云。今州將忠謀。翻然効順。叶其誠美。共贊良圖。我懸爵賞。候茲而授。宜加佐郡之命。仍寵殊階之序。貞元初。朝廷念公前功。加檢校大理少卿。依前徐州別駕當道團練判官。仍知州事。故其制云。嘗宰彭城。挈而歸國。舊勳若此。新寵蔑如。或不延厚於忠臣。將何勸於義士。宜崇亞列。再貳徐方。秩滿。又除檢校大理少卿。兼衢州別駕。秩滿。本道觀察

使皇甫政以公政績聞薦。又除檢校大理少卿兼襄州別駕。貞元十年五月二十八日終於襄陽官舍。享年六十六。其年權窆於襄陽縣東津鄉南原。至元和六年十月八日。嗣子居易等遷護於下邳縣義津鄉北原。從鞏縣府君宅兆而合祔焉。夫人潁川陳氏。陳朝宜都之後。祖諱璋。利州刺史。考諱潤。坊州鄜城縣令。妣大原白氏。夫人無兄弟姊妹。八歲丁鄜城府君之憂。居喪致哀。主祭盡敬。其情禮有過成人者。中外姻族咸稱異之。十五歲事舅姑。服勤婦道。夙夜九年。迨於奉蒸嘗。睦娣姒。待賓客。撫家人。又二十三年。禮無違者。故中外凡爲冢婦者。皆景慕而儀刑焉。又別駕府君卽世。諸子尚幼。未就師學。夫人親執詩書。晝夜教導。恂恂善誘。未嘗以一呵一杖加之。十餘年間。諸子皆以文學仕進。官至清近。實夫人慈訓所至也。夫人爲女。孝如是。爲婦。順如是。爲母。慈如是。舉三者與百行可知矣。建中初。以府君彭城之功。封潁川縣君。元和六年四月三日。歿於長安宣平里第。享年五十七。其年十月八日。從先府君祔於皇姑焉。有子四人。長曰幼文。前饒州浮梁縣主簿。次曰居易。前京兆府戶曹參軍。翰林學士。次曰行簡。前祕書省校書郎。幼子金剛奴。無祿。早世。初。高祖贈司空。有功於北齊。詔賜莊宅各一區。在同州同城縣。至今存焉。故自司空而下。都官郎中而上。皆葬於韓城縣。今以下歸不便。遂改卜鞏縣府君及襄州別駕府君兩塋於下邳縣義津鄉北原。其兩塋同兆域而異封樹。蓋從時宜。且叶吉也。謹狀。

卷三十

才識兼茂明於體用策一道

問。皇帝若曰。朕觀古之王者。受命君人。兢兢業業。承天順地。靡不思賢能以濟其理。求讜直以聞其過。故禹拜昌言而嘉猷罔伏。漢徵極諫而文學稍進。匡時濟俗。罔不率繇。厥後相循。有名無實。而又設以科條。增求茂異。捨斥己之至言。進無用之虛文。指切著明。罕稱於代。茲朕所以歎息鬱悼。思索其真。是用發懇惻之誠。咨體用之要。庶乎言之可行。行之不倦。上獲其益。下輸其情。君臣之間。矐然相與。子大夫得不勉思朕言而茂明之。我國家光宅四海。年將二百。十聖弘化。萬邦懷仁。三生之禮。靡不講。六代之樂。罔不舉。浸澤於下。昇中於天。周漢以還。莫斯爲盛。自禍階漏壤。兵宿中原。生人困竭。耗其大半。農戰非古。衣食罕儲。念茲疲屯。遠乖富庶。督耕植之業。而人無戀本之心。峻權酷之科。而下有重斂之困。舉何方而可以復其盛。用何道而可以濟其艱。既往之失。何者宜懲。將來之虞。何者當戒。昔主父懲患於晁錯。而用推恩。夷吾致弱於齊桓。而行寓令。精求古人之意。啓迪來哲之懷。眷茲洽聞。因所詳究。又執契之道。垂衣不言。委之於下。則人用其私。專之於上。則下無其効。漢元優游於儒學。盛業竟衰。光武責課於公卿。峻政非美。二途取捨。未獲所從。余心浩然。益所疑惑。子大夫熟究其旨。屬之於篇。與自朕躬。無悼後害。

對。臣聞漢文帝時。賈誼上疏云。可爲痛哭者一。可爲流涕者二。可爲長太息者三。是時漢興四十載。萬方大理。四海大和。而賈誼非不見之。所以過言者。以爲詞不切。志不激。則不能迴君聽。感君心。而發憤於至理也。是以雖盛時也。賈誼過言而無愧。雖過言也。文帝容之而不非。故臣不失忠。君不失聖。書之史策。以爲美談。然臣觀自茲已來。天下之理。未曾有髣髴於漢文帝時者。激切之言。又未有髣髴於賈誼疏者。豈非君之明聖不侔於文帝乎。臣之忠讜不逮於賈誼乎。不然。何衰亂之時愈多。而切直之言愈少也。今陛

下思禹之昌言而拜之。念漢之極諫而徵之。廢虛文之無用者。獎至言之斥己者。詢臣以可行之策。諭臣以不倦之意。懇惻鬱悼。發於至誠。此真聖王思至理求過言之明旨也。斯則陛下之道已弘於前代。臣之才識劣於古人。輒欲過言。以裨陛下明德萬分之一也。裨之者非敢謂言之必可行也。體用之必可明也。且欲使後代知陛下踐祚之後。有朴直敢言之臣出焉。無俾文帝賈誼專美於漢代。然後退而俯伏以待罪戾焉。臣誠所甘心也。謹以過言。昧死上對。伏蒙陛下賜臣之策。有思興禮樂之道。念救疲疻之方。辯懲往戒來之宜。審推恩寓令之要。至矣哉。陛下之念及此。實萬葉之福也。豈唯一代之人受其賜而已哉。臣聞疲病之作。有因緣焉。救療之方。有次第焉。臣請爲陛下究因緣。陳次第而言之。臣聞太宗以神武之姿。撥天下之亂。玄宗以聖文之德。致天下之肥。當二宗之時。利無不興。弊無不革。遠無不服。近無不和。貞觀之功既成。而大樂作焉。雖六代之盡美。無不舉也。開元之理既定。而盛禮興焉。雖三王之明備。無不講也。禮行故上下輯睦。樂達故內外和平。所以兵偃而萬邦懷仁。刑清而兆人自化。動植之類咸煦。嫗而自遂焉。雖成康文景之理。無以出於此矣。洎天寶以降。政教寢微。寇戎荐興。兵亦繼起。兵以遏寇。寇生於兵。兵寇相仍。迨五十載。財征由是而重。人力由是而罷。下無安心。雖日督農桑之課。而生業不固。上無定費。雖日峻管榷之法。而歲計不充。日削月朘。以至於耗竭其半矣。此臣所謂疲病之因緣者也。豈不然乎。由是觀之。蓋人疲由乎稅重。稅重由乎軍興。軍興由乎寇生。寇生由乎政缺。然則未修政教而望寇戎之銷。未銷寇戎而望兵革之息。雖太宗不能也。未息兵革而求征徭之省。未省征徭而求黎庶之安。雖玄宗不能也。何則。事有以必然。雖常人足以致。勢有所不可。雖聖哲不能爲。伏惟陛下將欲安黎庶。先念省征徭。將

欲省征徭。先念息兵革。將欲息兵革。先念銷寇戎。將欲銷寇戎。先念修政教。何者。若政教修。則下無詐僞暴悖之心。而寇戎所由銷矣。寇戎銷。則無興發攻守之役。而兵革所由息矣。兵革息。則國無餽餉飛輓之費。而征徭所由省矣。征徭省。則人無流亡轉徙之憂。而黎庶所由安矣。臣竊觀今天下之寇。雖已盡。銷。伏願陛下不以易銷而自息。今天下之兵。雖未盡。散。伏願陛下不以難散而自疑。無自息之心。則政教日肅。無自疑之意。則誠信日明。故政教肅。則暴亂革心。誠信明。則蠻驚歸命。革心。則天下將萌之寇。不遏而自銷。歸命。則天下已聚之兵。不散而自息。然後重斂。可日減。疲屯。可日安。富庶。可日滋。困竭。可日補。日安。則和悅之氣積。日富。則廉讓之風形。因其廉讓。而示之以禮。則禮易行矣。乘其和悅。而鼓之以樂。則樂易達矣。舉斯方面。可以復其盛。用斯道。而可以濟其難。懲既往之失。莫先於誠。不明而政不修。戒將來之虞。莫先於寇。不銷而兵不息。此臣所謂救療之次第者也。豈不然乎。若齊行寓令之法。以霸諸侯。漢用推恩之謀。以懲亡國。施之今日。臣恐非宜。何者。且今萬方一統。四海一家。無鄰國可傾。非夷吾用權之秋也。雖欲寓令。將何所寓耶。今除國建郡。置守罷侯。無爵土可疏。非主父矯弊之日也。雖欲推恩。恩將何所推耶。但陛下嗣貞觀之功。弘開元之理。必將光二宗而福萬葉矣。何區區齊漢之法。而足爲陛下所慕哉。精究之。端實在於此矣。又蒙陛下賜臣之間。有執契垂衣之道。委下專上之宜。敦儒學而業衰。責課實而政失者。此皆政化之所急。今古之所疑。陛下幸念之。臣有以見天下之理興矣。夫執契之道。垂衣不言者。蓋言已成之化。非謀始之謂也。委之於下者。言王者之理。庀其司分其務而已。非謂政無小大。悉委之於下也。專之於上者。言王者之道。秉其樞。執其要而已。非謂事無巨細。悉專之於上也。漢元優游於儒學。而盛業竟

衰者。非儒學之過也。學之不得其道也。光武責課於公卿。而峻政非美者。非考課之累也。責之不得其要也。臣請重爲陛下別白而明之。夫垂衣不言者。豈不謂無爲之道乎。臣聞無爲而理者。其舜也歟。舜之理道。臣粗知之矣。始則懋於修己。勞於求賢。明察其刑。明慎其賞。外序百揆。內勤萬樞。晷食宵衣。念其不息之道。夫如是。豈非大有爲者乎。終則安於恭己。逸於得賢。明刑至於無刑。明賞至於無賞。百職不戒而舉。萬事不勞而成。端拱凝旒。立於無過之地。夫如是。豈非真有爲者乎。故臣以爲無爲者。非無所爲也。必先有爲而後至於無爲也。老子曰。無爲而無不爲。蓋是謂矣。夫委下而用私。專上而無効者。此由非所宜委而委之也。非所宜專而專之也。臣請以君臣之道明之。臣聞上下異位。君臣殊道。蓋大者簡者。君道也。小者繁者。臣道也。臣道者。百職小而衆。萬事細而繁。誠非人君一聽所能徧察。一明所能周覽也。故人君之道。但擇其人而任之。舉其要而執之而已矣。昔九臣各掌其事。而唐堯乘其功以帝天下。十亂各効其能。而周武總其理以王天下。三傑各宣其力。而漢高兼其用以取天下。三君子者。不能爲一焉。但執要任人而已。亦猶心之於四肢。九竅百骸也。不能爲一焉。然而寢食起居言語視聽。皆以心爲主也。故臣以爲君得君之道。雖專之於上。而下自有以展其効矣。臣得臣之道。雖委之於下。而人亦無以用其私矣。由此而言。光武督責而政未甚美者。非他。昧君臣之道於小大繁簡之際也。漢元優游而業以寢衰者。非他。昧無爲之道於始終勞逸之間也。二途得失。較然可知。陛下但舉中而行。則無所惑矣。臣伏以聖策首章曰。思賢能以濟其理。求讜直以聞其過。又曰。上獲其益。下輸其情。其末章則又曰。興自朕躬。無悼後害。此誠陛下思酌下言。欲聞上失。勤勤懇懇。慮臣輩有所隱情者也。臣敢不再竭狂直。以副天心之萬一焉。臣聞古

先聖王之理也。制欲於未萌，除害於未兆，故靜無敗事，動有成功。自非聖王則異於是，莫不欲還於始，悔追於終。政失於前，功補於後，利害之効可略而言。且如軍暴而後戢之，兵亂而後遏之，善則善矣，不若防其微，杜其漸，使不至於暴亂也。官邪而後責之，吏姦而後誅之，懲則懲矣，不若審其才，得其人，使不至於姦邪也。人餒而後食之，人凍而後衣之，惠則惠矣，不若輕其徭，薄其稅，使不至於凍餒也。舉一知十，不其然乎。今陛下初嗣祖宗，新臨蒸庶，承多虞之運，當鼎盛之年，此誠制欲於未萌，除害於未兆之時也。伏惟陛下敬惜其時，重慎於事。既往者且追救於弊後，將來者宜早防於事先。夫然則保邦恆在於未危，恭己常居於無過，三五之道，夫豈遠哉。臣生也得爲唐人，當陛下臨御之時，覩陛下升平之始，斯則臣朝聞而夕死足矣。而況充才識之貢，承體用之問者乎。今所以極千慮，昧萬死，當盛時，獻過言者，此誠微臣喜朝聞甘夕死之志也。不然，何輕肆狂瞽，不避斧鑕若此之容易焉。伏惟少垂意而覽之，則臣生死幸甚，生死亡幸甚。謹對。

禮部試策五道 貞元十六年二月高侍郎試及第

第一道

問。周禮庶人不畜者祭無牲，不耕者祭無盛，不蠶者不帛，不績者不練，皆所以恥不勉，抑游惰，欲人務衣食之源也。然爲政之道，當因人所利而利之，故修其教，不易其俗，齊其政，不易其宜。由是農商工賈咸遂生業，若驅彼齊人，強以周索，牲盛布帛，必由己出，無乃物力有限，地宜不然，而匱神廢禮，誰曰非闕。且使日中爲市，懋遷有無者，更何事焉。

對。利用厚生。教之本也。從宜隨俗。政之要也。周禮云。不畜無牲。不田無盛。不蠶不帛。不績不縵。蓋勸厚生之道也。論語云。因人所利而利之。蓋明從宜之義也。夫田畜蠶績四者。土之所宜者。多人之所務者。故周禮舉而爲條目。且使居之者無游惰。無墮業焉。其餘非四者。雖不具舉。則隨土物生業而勸導之。可知矣。非謂使物易業。土易宜也。夫先王酌教本。提政要。莫先乎任土辨物。簡能易從。然後立爲大中。垂之不朽也。若謂其驅天下之人。責其所無。強其所不能。則何異夫求萍於中遠。植橘於江北。反地利。違物性。孰甚焉。豈直易俗失宜。匱神廢禮而已。且聖人辨九土之宜。別四人之業。使各利其利焉。各適其適焉。猶懼生生之物不均也。故日中爲市。交易而退。所以通貨食。遷有無。而後各得其所矣。由是言之。則大易致人之制。周官勸人之典。論語利人之道。三科具舉。有條而不紊矣。謹對。

第二道

問。書曰。眚災肆赦。又曰。宥過無大。而禮云。執禁以齊衆。不赦過。若然。豈爲政以德。不足恥格。峻文必罰。斯爲禮乎。詩稱既明且哲。以保其身。易稱利用安身。以崇德也。而語云。無求生以害仁。有殺身以成仁。若然。則明哲者。不成仁歟。殺身非崇德歟。

對。聖王以刑禮爲大憂。理亂繫焉。君子以仁德爲大寶。死生一焉。故邦有用禮而大理者。有用刑而小康者。古人有崇德而遠害者。有蹈仁而守死者。其指歸之義。可得而知焉。在乎聖王乘時。君子行道也。何者。當其王道融人心。質善者衆。而不善者鮮。一人不善。衆人惡之。故赦之可也。所以表好生惡殺。且臻乎仁壽之域矣。而肆赦有過之典。由茲作焉。及夫大道隱。至德衰。善者鮮。而不善者衆。一人不善。衆人效之。故

赦之不可也。所以明懲惡勸善。且革澆漓之俗矣。而執禁不赦之文。由茲興焉。此聖王所以隨時以立制。順變而致理。非謂德政之不若刑罰也。然則君子之爲君子者。爲能先其道。後其身。守其常。則以道善乎身。罹其變。則不以身害乎道。故明哲保身。亦道也。巢許得之。求仁殺身。亦道也。夷齊得之。雖殊時異致。同歸於一揆矣。何以覈諸。觀乎古聖賢之用心也。苟守道而死。死且不朽。是非死也。苟失道而生。生而不仁。是非生也。向使夷齊生於唐虞之代。安知不明哲保身歟。巢許生於殷周之際。安知不求仁殺身歟。蓋否與泰各繫於時也。生與死同歸於道也。由斯而觀。則非謂崇德者不爲成仁。殺身者不爲明哲矣。嗚呼。聖王立教。同出而異名。君子行道。百慮而一致。亦猶水火之相戾。同根於冥數。共濟於人用也。亦猶寒暑之相反。同本於元氣。共濟於歲功也。則用刑措刑之道。保身殺身之義。昭昭然可知歟。謹對。

第三道

問。聖哲垂訓。言微旨遠。至於禮樂之同天地。易簡之在乾坤。考以何文。徵於何象。絕學無憂。原伯魯豈其將落仁者不富。公子荆曷云苟美。朝陽之桐。聿來鳳羽。泮林之椹。克變鶡音。勝乃俟乎木雞。巧必資於瓦注。咸所未悟。庶聞其說。

對。古先哲王之立彝訓也。雖言微旨遠。而學者苟能研精鉤深。優柔而求之。則壺奧指趣。將焉廋哉。然則禮樂之同天地者。其文可得而考也。豈不以樂作於郊。而天神和焉。禮定於社。而地祇同焉。上下之大同。大和由禮樂之馴致也。易簡之在乾坤者。其象可得而徵也。豈不以乾以柔克而運。四時不言而善應。坤以陰隲而生。萬物不爭而善勝。柔克不言之謂易。陰隲不爭之謂簡。簡易之道。不其然乎。老氏絕學無憂。

傲其溺於時俗之習也。原伯魯不學將落。戒其廢聖哲之道也。孟子不富之說。慮蘊利而生孽也。公子荆苟美之言。嘉安人而豐財也。鳳鳴朝陽。非梧桐而不棲。擇木而集也。鶡止泮林。食桑椹而好音。感物而變也。事有躁而失靜。而得者。故木雞勝焉。有貴而失賤。而得者。故瓦注巧焉。雖去聖逾遠。而大義斯存。是故遠旨微言。可明徵矣。謹對。

第四道

問。天地有常道。日月有常度。水火草木有常性。皆不易之理也。至乃鄒衍吹律而寒谷暖。魯陽揮戈而暮景迴。呂梁有出入之游。周原變堇荼之味。不測此何故也。將以傳信乎。抑亦傳疑乎。

對。原夫元氣運而至精分。三才立而萬物作。惟天地日月暨水火草木。度數情性。各有其常。其隨事應物而遷變者。斯人之所感也。何哉。惟天地萬物父母。惟人萬物之靈。蓋天地無常心。以人心爲心。苟能以最靈之心。感善應之。天地至誠之誠。感無私之日月。則必如影隨形。響隨聲矣。而況於水火草木乎。故有吹律於寒谷。和氣生焉。揮戈於矍靈。暮晷迴焉。神合於水游。呂梁而出入不溺。化被於草木。周原而堇荼變味。蓋品彙之生。則守其常性也。精誠之至。則感而常通也。靜守常性。動隨常通。是道可於物。而非非常於一道也。夫如是。則兩儀之道。七曜之度。萬物之性。可察矣。可信矣。夫何疑焉。謹對。

第五道

問。紡績之弊。出於女工。桑麻不甚加。而布帛日已賤。蠶織者勞焉。公議者知之。欲乎價平。其術安在。又倉廩之實。生於農畝。人有餘則輕之。不足則重之。故歲一不登。則種食多竭。往年時雨愆候。宸慈軫懷。遣使

振廩分官賤糶。故得餒殍載活。麥禾載登。思我王度。金玉至矣。竊聞壽昌常平。今古稱便。國朝典制。亦有斯倉。開元之二十四年。又於京城大置賤。賤則加價收糶。貴則終年出糶。所以時無艱食。亦無傷農。今者若官司上聞。追葺舊制。以時斂散。以均貴賤。其於美利。不亦多乎。

對人者。邦之本也。衣食者。人之所由生也。古者聖人在上而下。不凍餒者。非家衣而戶食之。蓋能爲之開衣食之源。均財用之節也。方今倉廩虛而農夫困。布帛賤而女工勞。以愚所聞。粗知其本。何者。夫天地之數無常。故歲一豐必一儉也。衣食之生有限。故物有盈則有縮也。古人知其必然也。故敦儉嗇以足衣。務儲蓄以足食。是以禹有九年之水。湯有七年之旱。野無青草。人無菜色者。無他焉。蓋勤儉儲積之所致耳。故曰。前事之不忘。後事之元龜也。當今將欲開美利。利天下。以厚生。生蒸人。返貞觀之升平。復開元之富壽。莫善乎實倉廩。均豐凶。則耿壽昌之常平。得其要矣。今若升聞率修舊制。上自京邑。下及郡縣。謹豆區以出納。督官吏以監臨。歲豐則貴糶以利農。歲歉則賤糶以卹下。若水旱作沴。則資爲九年之蓄。若兵革或動。則餽爲三軍之糧。可以均天時之豐儉。權生物之盈縮。修而行之。實百代不易之道也。虞災救弊。利物寧邦。莫斯甚焉。然則布帛之賤者。由錐刀之壅也。苟粟麥足用。泉貨通流。則布帛之價輕重平矣。抑居易聞短絀。不可以汲深。曲士不可以語道。小子狂簡。不知所以裁之。莫究微言。空慚下問。謹對。

進士策問五道 元和三年爲府試官

第一道

問。禮記曰。事君有犯無隱。又曰。爲人臣者。不顯諫。然則不顯諫者。有隱也。無乃失事君之道乎。無隱者。顯

諫也。無乃失爲臣之節乎。語曰：不知命無以爲君子。易曰：樂天知命故不憂。又語曰：君子憂道不憂貧。斯又憂道者非知命乎。樂天不憂者非君子乎。夫聖人立言皆有倫理。雖前後上下若貫珠。然今離之則可以旁行。合之則不能同貫。豈精義有二耶。抑學者未達其微旨耶。

第二道

問：大時不齊。大信不約。大白若辱。大直若屈。此四者先聖之格言。後學之彝訓。有國者酌之以行化也。立身者踐之以修己也。然則雷一發而蟄蟲蘇。句萌達。霜一降而天地肅。草木衰。其爲時也大矣。斯豈不齊者乎。日月代明而晝夜分刻。漏者準之無秒忽之失焉。春秋代謝而寒暑節律。呂者候之無黍累之差焉。其爲信也大矣。斯豈不約者乎。堯讓天下而許由遁。周有天下而伯夷餓。其爲白也大矣。斯亦不辱者乎。桀不道。龍逢諫而死。紂不道。比干諫而死。其爲直也大矣。斯豈不屈己者乎。由是而觀。有國者立身者惑之久矣。衆君子試爲辨之。

第三道

問：大凡人之感於事。則必動於情。發於歎。興於詠。而後形於歌詩焉。故聞蓼蕭之詠。則知德澤被物也。聞北風之刺。則知威虐及人也。聞廣袖高髻之謠。則知風俗之奢蕩也。古之君人者。採之以補察其政。經緯其人焉。夫然。則人情通而王澤流矣。今有司欲請於上。遣觀風之使。復採詩之官。俾無遠邇。無美刺。日採於下。歲聞於上。以副我一人憂萬人之旨。識者以爲何如。

第四道

問。百官職田。蓋古之稍食也。國朝之制。懸在有司。兵興已還。吏鮮克舉。今稽其地籍。則田亦具存。計以戶租。則數多散失。至使內外官中有品秩等。局署同而厚薄相懸。不啻乎十倍斯者。積弊之甚也。得不思革之乎。請陳所宜。以救其失。

第五道

問。穀帛者。生於下也。泉貨者。操於上也。必由均節。以致厚生。今田疇不加闢。而菽粟之價日賤。桑麻不加植。而布帛之估日輕。懋力者。輕用而愈貧。射利者。賤收而愈富。至使農人益困。游手益繁矣。然豈穀帛斂散之節。失其宜乎。將泉貨輕重之權。不得其要乎。今天子方策天下。賢良政術之士。親訪利病。以活元元。吾子若待問於王庭。其將何辭以對。

奉勅試制書詔批答詩等五首 元和二年十一月四日自集賢院召赴銀臺候進旨五日召入翰林勅奉試制詔等五首翰林院使梁守謙奉宣宜授翰林學士數月除左拾遺

奉勅試邊鎮節度使加僕射制

將仕郎守京兆府蓋匡縣尉集賢殿校理臣白居易進

門下鎮寧三邊。左右百揆。兼茲重任。必授全材。某鎮節度使某乙。天與忠貞。日彰名節。德溫以肅。氣直而和。明略足以佐時。英姿足以遏寇。累經事任。歷著勳庸。中權之令風行。外鎮之威山立。戎夷懾服。漢兵無西擊之勞。疆場底寧。胡馬絕南牧之患。禁暴而三軍輯睦。除害而百姓阜安。千里長城。一方內地。實嘉乃績。爰簡朕心。夫竭力輸誠。爲臣之大節。念功懋賞。有國之恆規。願茲忠勤。宜進爵秩。爾有統戎之略。已授

旌施。爾有宣贊之猷。特加端揆。往踐厥職。其惟有終。可尙書左僕射。餘如故。主者施行。

與金陵立功將士等勅書

勅。浙西立功將士等。朕自臨寰宇。已再逾年。以忠恕牧萬人。以恩信馭百辟。動必思於卹隱。靜無忘於泣辜。庶乎馴致小康。寔與大道也。李錡因緣屬籍。踐歷官常。包藏禍心。素懷梟獍之性。彰露凶德。忽發豺狼之聲。朕念以宗枝。務於容貸。諭以迷復。卒無悛心。而乃保界重江。竊弄凶器。抵捍朝命。驅脅師人。背德欺天。亂常干紀。蜂蠆之毒。流於郡縣。犬彘之行。肆於閨門。惡稔禍盈。親離衆叛。人神共棄。天地不容。卿等忠憤闡彰。義勇潛發。變疾風雨。謀先鬼神。中推赤心。前蹈白刃。率其膂力。死命於軍前。擒其兇魁。生致於闕下。廓千里之沴氣。濟一方之生人。誠感君親。義激臣子。臨危見不奪之節。因事立非常之功。予嘉乃誠。一念三歎。至於圖勞懋賞。詢事策勳。各有等差。續當處分。故先宣慰。宜並悉之。冬寒。卿等各得平安好。遺書指不多及。

與崇文詔

勅。崇文。卿忠廉立身。簡直成性。董戎長武。邊侯又安。授律西川。兇徒蕩滅。是以寵崇外闕。秩進上公。而能省事安人。多方撫俗。諭朕念功之旨。勉其師徒。宣朕卹隱之心。慰彼黎庶。威立無暴。功成不居。累陳表章。懇請朝覲。雖殿邦之寄重。誠欲藉才。而望闕之戀深。固難奪志。且嘉且歎。彌感於懷。屬時候嚴凝。山川修阻。永言跋涉。當甚勤勞。佇卿來思。副朕誠望。想宜知悉。冬寒。卿比平安好。遺書指不多及。

批河中進嘉禾圖表

上天降休。下土効祉。將表豐年之兆。故生同穎之祥。顧慚寡德。受此嘉瑞。披圖省表。閱視久之。卿發誠自中。歸美於上。亦宜勉勤匡贊。馴致邕熙。庶洽升平之風。以叶和同之慶。所賀知。

大社觀獻捷詩

淮海妖氛滅。乾坤嘉氣通。班師郊社內。操袂凱歌中。廟算無遺策。天兵不戰功。小臣同鳥獸。率舞向皇風。

卷三十一

張徹宋申錫可並監察御史制

勅。舊制副丞相缺。中執憲得出入。御史缺。則於內外史中考覈其實。封奏其名以補之。今御史中丞僧孺奏某官張徹某官宋申錫皆方直強白。可中御史。章下丞相府。丞相亦曰可。朕其從之。並可監察御史。

楊子留後殷彪授金州刺史兼待御史河陰令章同憲授南鄭令章弁授絳州長史三人同制

勅。其官殷彪等。今之郡守古侯伯也。今之邑令古子男也。於吏有君臣之道焉。於人有父母之道焉。郡邑之間。承上率下者。州長史也。凡此之官。與吾共理。使吾人安而無怨者。其在吏良而政平乎。金秦之郡也。奏告專達。得行異政。以彪清平信惠。臨事能守。小大之職。率著名績。故仍憲簡。俾往牧之。南鄭梁之邑也。上有賢帥。無憂掣肘。以同憲河陰。有政可以移用。故換銅印。俾往宰之。而絳爲名藩。弁實良士。命之贊貳。亦叶其宜。宜各悉心修舉三職。可依前件。

馮宿除兵部郎中知制誥制

勅。吾聞武德暨開元中有顏師古。陳叔達。蘇頌。稱大手筆。掌書王命。故一朝言語。煥成文章。朕承祖宗。思濟其美。凡選一才。補一職。皆不敢輕易。其庶幾前事乎。刑部郎中馮宿。爲文甚正。立意甚明。筆力雄健。不浮不鄙。況立身守事。端方精敏。而我誥命。忽思潤色之。聽諸人言曰。宿也可。宿立朝。歷御史。博士。郡守。尚書郎。在仕進途。不爲不遇。然不登茲選。未足其心。故吾於今。歸汝職業。仍遷秩爲五兵郎中。勉繼顏陳。無辱吾舉。可尚書兵部郎中知制誥。

鄭覃可給事中制

勅。給事中之職。凡制勅。有不便於時者。得封奏之。刑獄有未合於理者。得駁正之。天下冤滯無告者。得與御史糾理之。有司選補不當者。得與侍中裁退之。率是而行。號爲稱職。固不專於掌侍奉。讚詔令而已。中大夫行諫議大夫雲騎尉滎陽縣開國男食邑三百戶鄭覃。清節直行。正色寡言。先臣之風。藹然猶在。自居首諫。益勵審諤。擢領是職。必有可觀。亦欲天下聞之。知吾獎骨鯁之臣。來諫諍之道也。可給事中。散官勳如故。

韋審規可西川節度副使御史中丞李虞仲崔戎姚向溫會等並西川判官皆賜緋各檢校省官

兼御史制

勅。西川曰益部。地有險。府有兵。礙戎屏華。號爲難理。故吾命文昌爲帥長。俾鎮撫焉。次命審規爲上介。俾左右焉。又命虞仲戎向會等爲庶寮。俾咨度焉。進言者謂文昌賢而審規輩才。以才佐賢。蜀必理矣。輟三署吏。贊丞相府假憲官職。加臺郎暨一命再命之服。以遺之。其於張大光榮。與四方征鎮之賓寮。不侔矣。

爾等苟佐吾丞相以善政聞。使吾無一方之憂。吾寧久遺汝於諸侯乎。爾其勉之。可依前件。

魏博軍將呂晃等從弘正到鎮州。各加御史大夫賓客等制。

勅。去年冬。命侍中弘正建大將軍旗鼓。移鎮於成德軍。而晃已下四十有一人實從魏來。或驅或殿。被堅執銳。可謂有勞。宜以宮坊之寮。憲府之職。隨其名秩序而寵之。可依前件。

張平叔可戶部侍郎判度支制

勅。故事。君使臣。其道不一。或先勞而後受賞。或先加寵而後貴功。蓋宜便有後先。明事有緩急。故耳。朝議大夫守鴻臚卿兼御史大夫判度支上柱國賜紫金魚袋張平叔。國之材臣也。計能折秋毫。吏畏如夏日。司會逾月。綱條甚張。況師旅未息。調食方急。倚成取濟。非爾而誰。故自大鴻臚換居人部。造膝而授。不時而遷。其要無他。是欲急吾事而望倚爾功也。公卿以降。羣有司盈庭。然問曰。與吾坐而決事。丞相以下。不過四五。而主計之臣在焉。非智能則事不可成。非諒直則吾難近。噫。職局之外。得不思稱官望而厭我心乎。可守尚書戶部侍郎判度支。散官勳賜如故。

李虞仲可兵部員外郎崔戎可戶部員外郎制

勅。劍南西川節度判官朝散大夫檢校尚書戶部郎中兼侍御史上柱國賜紫金魚袋李虞仲。西川觀察判官朝議郎檢校刑部員外郎兼侍御史雲騎尉賜緋魚袋崔戎等。去年春。朕憂西南事。授丞相文昌鉞。鎮撫之。次選郎吏有才實如虞仲輩者。往贊理之。故其制云。苟佐吾丞相以善政聞。寧久遺汝於諸侯乎。今蜀政成矣。蜀人父矣。是汝輩職修事舉而奉吾詔書甚謹也。前言在耳。安可弭忘。並命爲郎。主吾信賞。

虞仲可行尚書兵部員外郎。戎可尚書戶部員外郎。散官勳如故。

牛僧孺可戶部侍郎制

勅。戶部侍郎。周之地官。小司徒也。掌天下田戶之圖。生齒之衆。賦役貨幣之政令。以待國用而實歲成。元和以還。日益寵重。善其職者。多登大任。中茲選者。莫匪正人。誰其稱之。我有邦彥。朝議郎守御史中丞。上柱國。賜紫金魚袋。牛僧孺。自舉賢良。踐歷臺閣。秉潤色筆。提糾繆綱。而書命無繁詞。決事無留獄。受寵有憂色。納忠多苦言。朕心知之。何用不可。夫以人曹之重。如彼。僧孺之賢。若此。俾居是職。不亦宜乎。可守尚書戶部侍郎。散官勳如故。

庾承宣可尚書右丞制

勅。朝議大夫守尚書刑部侍郎。驍騎尉。庾承宣。昔我太宗文皇帝嘗謂尚書丞百職綱維。事一失中。則天下有受其弊者。因命戴胄。魏徵。及杜正倫。劉洎。輩繼領是職。分居左右。官修事理。人到于今稱之。故吾前命崔從持左綱。今命承宣操右轄。衆口籍籍。頗爲得人。況承宣端諒勤敏。周知典故。必能爲我紐有條之綱。柅妄動之輪。坐曹得出入郎官。立朝得奏彈御史。決會政要。扶樹理本。無俾戴魏。劉杜。專美於貞觀中。可守尚書右丞。散官勳如故。

張聿可衢州刺史制

勅。中散大夫行尚書工部員外郎。上柱國。吳縣開國男。食邑三百戶。張聿。內外庶官。同歸共理。牧守之任。最親吾人。蓋弛張舉措。由其心。賞罰威福。懸其手。若一日失其職。一郡非其人。而未達於朝聽之聞。爲害

已甚矣。選授之際，得不慎夫。以爾聿前領建谿，有理性，次臨沔郡，著能名，用爾所長，副吾所急，宜輟郵署，往頒詔條，來暮之聲，佇入吾耳，可使持節，衢州刺史，散官勳如故。

是集第三十一卷原空七十三行，覆案卷首目錄，佚題凡九，近獲明錫山華氏銅活字本，源出趙宋，取以對勘，其第四十八卷篇什次第，與是本第三十一卷同，闕文在焉，實凡七十六行，又七字，亟爲錄附集末，以成完書，惜是本原空白葉出諸臆計，行字未能脗合耳。丁卯八月，吳縣姜殿揚識。

辛丘度可工部員外郎李石可左補闕李仍叔可右補闕三人同制

勅朝散大夫右補闕內供奉飛騎尉辛丘度等，朕詔丞相求方略忠讜之士，置於左右，而播等以右暨仍叔，應詔言其爲人厚實，審直，嘗以文行謀畫，從容於幕府之間，臨事敢言，當官能守，可使束帶同升，諸朝又言丘度介潔靜專，不交勢利，宜加推獎，以勸其徒，況久次者轉遷，後來者登進，皆適所用，平章可之，可依前件。

魏博軍將薛之縱等十四人各授官爵制

勅薛之縱等，去年冬授勳鉞，俾自徐鎮潞而愬越，與其麾下同德，食不求飽，席不暇暖，節鎮殿定，一如所委，此誠愬之忠略，然所賴之縱等，焦心戮力，同濟厥功，而頒賞已逾時，秩宜加等，我有爵祿，分而命之，知吾不遺細大之功，可依前件。

襄度李夷簡王播鄭綱楊於陵等各賜爵并迴授爵制

勅禮云。臣下竭力盡忠。以立功於國者。必報之以爵祿。此言上之不虛取於下也。而司空度等咸以忠力作股肱心膂之臣。大節大勞。書在甲令。然則功如是。忠如是。高爵重秩。予何愛焉。故能統御之初。先行信賞。詔主爵者。合爲奏書。或加寵進封。或延恩任子。次勤第品。咸按舊章。行乎敬之。無忝予一人之嘉命。可依前件。

鄭餘慶楊同縣等十人亡母追贈郡國夫人制

勅。鄭餘慶亡母某氏等。夫德不旌。則勸善之典缺矣。親不顯。則揚名之道廢矣。凡今公卿大夫。至於元士。濟濟然抱忠履信。立吾朝者。皆聖善之教。燕翼之方所致也。自家刑國。有所從來。不大封崇。是忘報施。朕去年仲月。統御之初。發號推恩。先降是命。豈直光前慰後而已哉。亦欲使天下爲母者。聞庶幾乎善。統其家。慈訓其子。厚人倫而美教化也。可不務乎。

李真授咸陽令制

勅。某官李真。近者西夷犯塞。詔諸將出師。司計臣俊言。置有應辯才。可司饋餉。故自京府掾。假臺郎憲職。以命之。屬寇遁師旋。未展其用。況在公族。推有器幹。今授銅印。俾宰咸陽。夫庶官之任爲急。西郊咫尺。佇爾能聲。可京兆府咸陽縣令。

劉縱授祕書郎制

勅。某官劉縱。徒步詣闕。上獻封章。又自敘其先臣陳許間事。皆歷歷可聽。公侯子弟。多溺於驕邪。爾能讀書學文。自可加獎。圖籍之府。命爾爲郎。豈唯振滯求能。且不欲使勳勞之後。棲棲於塵土中。可祕書省祕

書郎

程羣授坊州司馬制

勅。程羣嘗從事於鎮冀之間。病免所職。垂老之歲。棄爲窮人。佹佹無歸。有足傷者。夫一夫不獲。若納諸隍。此聖王用心。推己及物。今宜與羣祿食。使飽暖其身。亦猶晉君不能忘情於絳老也。往佐中部。爾其念哉。可坊州司馬。

海州刺史王元輔加中丞

勅。海州刺史王元輔。漢制二千石有政績者。就中加命秩。不卽改移。蓋欲使吏久於官而人安於化也。今元輔爲郡。頗有理名。廉使上聞。奏課居最。宜加中憲。旌而寵焉。庶使與吾共理者聞而知勸。可兼御史中丞。

楊潛可洋州刺史李繁可遂州刺史史備可濠州刺史制

勅。朝散大夫守尙書金部郎中上柱國楊潛。溫厚靜專。有端士之操。朝議大夫前使持節吉州諸軍事吉州刺史上柱國李繁。精強博敏。有才子之稱。將士郎前使持節光州諸軍事守光州刺史雲騎慰史備。變通健決。有良吏之用。而能本於文學。輔以政事。爲郎見其行。爲郡聞其聲。夫洋東梁之險。遂居蜀之腴。濠控闕文至此爲止。淮之要。三者皆名郡。而委之三吏。得不思勤儉教導。勞來安緝。膏雨吾土。襦袴吾人。者乎。潛可使持節洋州諸軍事。守洋州刺史。散官勳如故。繁可使持節都督遂州諸軍事。守遂州刺史。備可使持節濠州諸軍事。守濠州刺史。充團練渦口西城等事。官勳如故。

張洪相里友略並山南東道判官同制

勅。朝議郎守太常博士上柱國張洪。前瀛漠等州都團練判官朝議郎侍御史內供奉上柱國賜緋魚袋相里友略等。元翼以大節大忠。綽聞朝野。授鉞開府。殿我漢南。而又求賢乞能。以自參貳。則其竇窠宜有以稱之。故求吾俊造之英。勳列之胄。達朝儀而練戎事者與焉。今以洪之知國禮。奉家聲。以友略之富藝文。飽軍旅。兩中是選。合而命之。優秩寵章。無所愛惜。時無今古。代有忠賢。苟致吾元翼於羊杜間。別有陟明之典。在洪可檢校尚書職方員外郎兼侍御史。充山南東道節度判官。仍賜緋魚袋。散官勳如故。友略可檢校尚書屯田員外郎兼侍御史。充山南東道觀察判官。散官勳如故。

姚成節右神策將軍知軍事制

勅。朝議郎前使持節成州諸軍事守成州刺史充本州守捉使賜紫金魚袋姚成節。嘗爲天平軍裨將。當劉悟之立忠勳也。謀成事集。爾有助焉。雖授一城。未足酬獎。況聞信厚勤恪。宜於爪牙肘腋間居之。昔漢文帝以宋昌忠勞。擢拜將軍。掌宿衛。今吾用汝。猶前志也。環拱之職。得不勉歟。可毅果校尉守右神策將軍知軍事。賜如故。

高錢等一十人亡母鄭氏等太君制

勅。起居郎高錢亡母滎陽郡太君鄭氏等。予有侍臣。咸士之秀者。或左右以書吾言動。前後以補吾闕遺。森然在庭。各舉其職。爰思乃教。知所從來。豈非善稟於親。行成於內。徙鄰斷織。訓使然耶。不追封邑之榮。曷顯統家之慶。可依前件。

柳公綽可吏部侍郎制

勅京兆尹兼御史大夫柳公綽。長吏數易。爲害甚多。邇來都畿。未免斯弊。或苛急而人重困。或懦弱而姦不息。得其中者。其公綽乎。細大必躬親。剛柔不吐茹。甚稱厥職。惜而不遷。然智者常憂。忠者常勞。亦非吾以平施御臣下之道也。尙書六職。天官首之。辯論官材。澄汰流品。比諸內史。選妙秩清。詢衆用能。無易公綽。爾宜飾躬承命。以裴王崔毛爲心。苟副吾言。用稱乃職。而今而後。亦何往而不適哉。可尙書吏部郎侍。孔魏可右散騎常侍制。

勅昔齊桓公。心體懈墮。則隰朋侍。漢武帝親重儒術。則劉向從。今之常侍。是其選矣。稱其任者。唯正人乎。吏部侍郎孔魏。言行謹直。風操端莊。肅然禮容。清廟之器。始自筮仕。迄於天官。虛舟爲心。利刃在手。全才具美。時論多之。可使珥貂。立吾左右。從容侍從。以備顧問。隰朋劉向。豈遠乎哉。可右散騎常侍。

王公亮可商州刺史制

勅尙書司門郎中王公亮。茂於學。精於文。文學之外。有析毫剗鍾之用。自佐戎律。領郡符。持憲爲郎。皆稱厥職。吾前命劉遵古。張平叔爲商州刺史。繼有善政。人用乂安。今爾代之。守而勿失。況商土瘠。商人貧。可以靜理而阜安。不宜改絃而易轍。以爾精敏。當自得中。可商州刺史。

韋觀可給事中庾敬休可兵部郎中知制誥同制

勅職之要。莫先乎駁正文之選。莫難於司言。將使朝綱有條。朕命惟允。在二者得人而已。中大夫使持節。蘇州諸軍事。守蘇州刺史。上騎都尉韋觀。精微專直。通乎事典。可使平奏議而坐右曹。朝散大夫尙書禮

部郎中上柱國庾敬休。溫裕端明。飾以辭藻。可使書誥。命而專右席。而輪轅鑿柄。各適所宜。夫惟刺史守列城。郎官應列宿。選任倚注。非不榮重。然吾左右前後。方求正人。如覬敬休。不宜疎遠。亦猶有聲之玉。無類之珠。不置佩服之中。掌握之上。皆非其所也。宜自敬謹。無忝吾言。覬可行給事中散官勳如故。敬休可尙書兵部郎中知制誥。散官勳如故。

卷三十二

李愬贈太尉制

勅。故特進行太子少保上柱國涼國公食邑三千戶食實封伍伯戶李愬。在建中歲。泚賊叛逆。惟太師晟實仗大順。翦而滌之。在元和朝。蔡寇充斥。惟爾愬實奮奇策。虜而戮之。父子之功。書于甲令。俱爲第一。焯輝當時。矧爾一登將壇。六換鈇鉞。坐論巖廊之道。臥理保傅之事。方深倚望。奄忽淪謝。是用當食累歎。視朝三輟。豈不以爪牙之威。缺於外股。肱之痛。軫於中者乎。而弔奠之命。賄賂之數。雖加常等。未表殊恩。宜以太尉之秩。贈上公之袞。斂俾爾被哀榮。服忠孝。從先太師於九原也。不其盛歟。嗚呼。美終必復。禮無不答。昔爾之勤勞。如彼。今吾之寵飾。如此。君臣報施。可謂兩臻其極焉。爾靈有知。欽我追命。可贈太尉。仍令所司備禮冊命。賜絹二千匹。布七百端。米粟一千石。委度支送。

田布贈右僕射制

勅。朕聞古之臣子。有忍死効節爲忠者。有不傷髮膚全歸爲孝者。有不顧性命引決爲忠者。但問所操所

蹈何如耳。豈繫去就生死之間耶。噫。今有重義如泰山。輕生如鴻毛。死而不朽者。安得不褒揚寵飾。使天下聞之。所以勸孝心。激忠腸。然後薄者敦。懦者立。幸生者恥格也。故魏博等州節度觀察處置等使。起復寧遠將軍守右金吾大將軍員外置同正員檢校工部尚書兼魏州大都督府長史御史大夫。賜紫金魚袋。田布其父太尉甚賢此子。鎮陽之亂。弘正歿焉。而布枕戈嘗膽。誓報冤恥。故吾以大將軍之旗鼓。鈇鉞先臣之土壤。士卒盡用。委付親加。勉諭人鬼。憤期一洩。而甘心焉。旣而激發魏師。出疆臨敵。事有不得已者。布亦末如之何。卒至於刳心自明。遺疏自列。謝君於天上。報父於地下。可謂田氏有孝子。國家有烈臣。則吾之知臣。弘正之知子明矣。聳動人聽。靈傷我懷。故廢臨朝。可以示哀也。加禮命。所以示榮也。哀榮恩禮。至則至矣。嗚呼。曾未足以顯爾之節。不厭吾之心乎。可贈尚書右僕射。賜布帛三百段。米粟二千石。委度支逐便支遣。

韋貫之可工部尚書制

勅。河南尹韋貫之。善馭者。齊六轡。善理者。正六官。六官成。則百事舉。故吾選賢任舊。以次第補之。而六卿材吾已得五。闕一不可待汝而成。貫之以正行明誠。爲先朝輔。始以直進。終以直退。道有消長。德無淄磷。及帥湘潭。尹河洛。而廉平清壹之政。繼聞于京師。名簡吾心。善入吾耳。宜置朝右。以之厚時風。況今之尙書。漢公卿也。言動可否。屬人耳目焉。固不專率四屬。程百工。備位於冬官而已。可工部尚書。餘如故。

太子詹事劉元鼎。可大理卿兼御史大夫。充西番盟會使。右司郎中劉師老。可守本官充盟會副使。通事舍人太僕丞李武。可守本官兼監察御史。充盟會判官。三人同制。

勅太子詹事劉元鼎等。夫選可任而任之。則用無不適。擇可勞而勞之。則事無不成。蓋君使臣。臣事君之大端也。屬西夷乞盟。求可以莅之者。歷選多士。吾得三人。今以元鼎之博通。師老之誠諒。武之恭敏。合而爲用。不亦可乎。爾宜臨之以莊。示之以信。儀形辭氣。皆有可觀。必能率服。彼戎不獨益敬。吾使法卿憲秩。寵之以遣。可依前件。

許季同可祕書監制

勅大理卿許季同。國朝已來。有劉得威。張文瓘。唐臨爲大理卿。有魏徵。虞世南。顏師古爲祕書監。則設官之重。得賢之盛。人到于今。稱之。今季同以明慎。欽恤。理刑獄。以文學。博雅。長圖籍。由廷尉而長祕府。論者榮之。宜自重其官。自遠其道。又思與劉張唐魏虞顏爲比。不亦自多乎。可祕書監。

張元夫可禮部員外郎制

勅殿中侍御史張元夫。官有秩清而選妙者。其儀曹員外郎之謂乎。凡殿內御史。雖文才秀出。功課高等者。滿歲而授。猶曰美遷。有如元夫。連膺二遷。歷彼踐此。僉以爲宜。況怒飛青冥。翔集禁陛。由茲去者。十八九焉。汝知之乎。思有以稱。可尙書禮部員外郎。

楊嗣復可庫部郎中知制誥制

勅權知兵部郎中楊嗣復。朕聞前代制誥。中書令侍郎舍人通掌之。國朝已來。或以他官兼領。惟其人是用。不限於資秩職署焉。予以爲然。多繇是選。前所命者。時稱得人。研實覈名。次第及汝。汝嗣復根於義訓。播爲令器。文煥發而才秀出。不當汨沒於郎吏間。況貞元中。汝父爲中書舍人。甚稱厥職。今使汝繼書吾

命成一家言堂構國華。在於此舉。爾宜兢兢祇勵。無隕其名。可庫部郎中知制誥。

張平叔可京兆少尹知府事制

勅。商州刺史張平叔。爲人廉直。爲政簡惠。前後歷據邑宰郡守。而去思來慕之謠。繼聞於人聽焉。及副鹽鐵官。刺商維部。會課報政。亦甲於他官。自貞元已來。用三科取士。奉詳明政術。可以理人之詔。而得其名。有其實者。幾何人哉。平叔居其一也。能効若是。何用不臧。故事。內史缺。未補間。亞尹得行。大京兆事。試可。而卽眞者。往往有之。故其選任。日益難重。爾宜稱所舉。慎厥職。無墮大以勤小。無急弱以緩強。夕念朝行。遵吾約束。可京兆少尹知府事。

康日華贈坊州刺史制

勅。漢令軍中士有不幸死者。得以棺斂傳送。若是而已。猶四方歸心焉。矧吾褒贈以榮之。惻隱以將之。顯其忠。撫其後。亦所以激生者節。豈獨慰逝者魂乎。左神策軍赴行營。正將試太常卿康日華。領王師。死王事。軍書置奏。朕甚悼焉。可贈坊州刺史。

張籍可水部員外郎制

勅。登仕郎守國子博士張籍。文教興則儒行顯。王澤流則歌詩作。若上以張教流澤爲意。則服儒業詩者。宜稍進之。頃籍自校祕文。而訓國胄。今又覆名揣稱。以水曹郎處焉。前年已來。凡歷文雅之選三矣。然人皆以爾爲宜。豈非篤於學。敏於行。而貞退之道勝耶。與之寵名。可以獎夫不及。汲於時者。可守尙書水部員外郎。散官勳如故。

何士乂可河南縣令制

勅漢朝郎官出宰百里。故今京邑令缺。多命尚書郎補焉。朝議郎尚書水部員外郎何士乂。慎檢和易。介然有常。守而勿失。可使從政。然能佩弦以自導。帶星以自勤。則緩急勞逸之間。必使適宜而會理矣。以爾思退。故吾進之。可守河南縣令。散官如故。

崔植一子官迴授姪某制

勅丞相植典職樞務。亦既逾歲。而能明我目。達我聰。左右我躬。以底于道。況屬郊祀。攝贊大儀。寵錫之間。植宜加等。而念其猶子。乞用推恩。既叶舊章。允膺新命。其姪某可某官。

王起等賜勳制

勅中書舍人王起等。朕臨馭之始。慶賞遂行。卿士大夫。遞加勳秩。自武騎尉以上。十有二轉。自起已下。十有四人。咸賜以勳。舉書于籍。可依前件。

蕭俛除吏部尚書制

勅古者君使臣以禮。臣事君以忠。季代已還。鮮由茲道。先皇帝創於是。故在位十五載。凡解相印者。殆二十人。多寵爲大僚。或付以兵柄。矧予小子。宜有加焉。而輔弼之臣。嘗經一日。造吾膝。沃吾心。則思與之。始終厚申恩禮。不唯勸感來者。且不敢失墜先志也。尚書右僕射蕭俛。忠肅孝敬。佐吾爲理。以勤事國。以疾退身。本末初終。不失其道。既免樞務。倚爲右揆。加恩超等。復吾前言。而俛繼上讓章。至於三四。敦諭煩切。陳乞彌堅。是用正命爲選部尚書。而冠六卿。統百職。尚可以表吾寵重。亦所以成爾謙光。爾宜欽厥止。慎

厥終無忝我褒揚之命。可吏部尙書。

溫堯卿等授官賜緋充滄景江陵判官制

勅。溫堯卿等。今之俊乂。先辟于征鎮。次升于朝廷。故幕府之選。下臺閣一等。異日入爲大夫公卿者。十八九焉。荆門景域。南北大府。而堯卿等。或已參軍要。或方受兵書。各命以官。分試其事。名秩章綬。分而寵之。夫千里之行。始於足下。苟自強不息。亦何遠而不屆哉。可依前件。

神策軍及諸道將士某等一千九百人各賜上柱國勳制

勅。古之善爲國者。勞不忘而賞不濫。有賞一人而爲僭者。有千百人而不爲費者。其要在當否而已。不繫於衆寡也。朕自統御已來。忽忽有念。念天下材力之將。勇敢之士。進有征討之苦。退有守捍之勤。藏之中心。何嘗暫忘。而亟因大慶。思洽普恩。某等若干人。咸進勳級。並可上柱國。

李彤授檢校工部郎中充鄭滑節度副使王源中授檢校刑部員外郎充觀察判官各兼侍御史
賜緋紫制

勅。萬年令李彤。侍御史王源中等。舜以五長綏四國。若今之節制也。周二十聯率諸侯。若今之廉察也。國家合爲一柄。付有功諸侯。故其陪臣。選任益重。或輟朝籍。授簡書者。往往而有。況承元有大忠于國。受重任于外。使其承上莅下。敬始善終。實在庶寮。叶力以濟。今以彤宰京邑。有理劇之用。如水在器。撓之不濁。以源中立憲府。有糾正之能。如刃發硎。割之無滯。一可以倅戎事。一可以佐輶車。二職交修。在此一舉。臺郎憲吏。金印銀章。加乎爾身。無忝我命。可依前件。

柳公綽父子溫贈尚書右僕射竇侁父叔向贈工部尚書薛伯高父擇贈尚書司封郎中元宗簡父鋸贈尚書刑部侍郎皇甫鏞父愉贈尚書右僕射韋文恪父漸贈太子少保王正雅父翊贈太子太師范季睦父彥贈禮部郎中八人亡父同制

勅。古人有云。樹欲靜而風不止。子欲養而親不待。向無顯揚褒贈之事。則何以旌先臣德。慰後嗣心乎。故朕每施大恩。行大慶。而哀榮之命。未嘗闕焉。銀青光祿大夫行尚書吏部侍郎上護軍河東縣開國子柳公綽。父溫等。咸有令子。集于中朝。資父事君。移忠自孝。本於嚴訓。酬以寵名。賜命追榮。各高其等。嗚呼。存者不匱。往者有知。斯可以載揚蘭陔之光。輟風樹之歎耳。可依前件。

李宗河可渭南令李玘可京兆府戶曹制

勅。李宗河等。夫綱一提。則羣目舉。源一澄。則衆流清。故朝廷命官。師選寮屬。亦得其人矣。按內史公綽。奏宗河學古。修己練達。理道乃乞爲甸縣令。玘勵節徇公。通詳典故。乞爲天府掾。況渭南封圻之守。邑戶曹府籍之要。司位雖未高。職亦不細。宜乎以三語自試。以一同自効。無俾爾長貽失舉之責焉。可依前件。

兵部郎中知制誥馮宿。侍御史裴注。義武軍行軍司馬御史中丞蕭籍。饒州刺史齊照。鄧州刺史渾鐵。並可朝散大夫同制。

勅。某官馮宿等。凡品法之制。有九自五而上。謂之貴階。而宿司吾言。注持吾憲。籍照以降。皆著勤由。朝議郎一進而及此。此之所以爲貴者。蔭及子。命及妻。豈唯腰白金。服赤菲。從大夫之後而已。寵數旣重。思有以稱之。並可朝散大夫。

太常博士王申伯可侍御史鹽鐵推官監察御史裏行高諧河東節度參謀兼監察御史崔植並可監察御史三人同制

勅某官王申伯學優行茂飾以詞藻執禮定議多得其中某官高諧溫莊潔白不交勢利某官崔植外和內直通知政典在倫輩內而人皆謂之滯淹唯是二三子之才吾得於御史中丞僧孺御史吾耳目官也非清明勁正不泥不撓者安可使辨淑慝振紀律廣吾之聰明焉並命同升無忝是舉可依前件

溫造可起居舍人充鎮州四面宣慰使制

勅殿中侍御史溫造嘗糾天府不曠官馳軺車不辱命況爲人外和內決以兼濟爲心拔居殿中以備時使會吾憂兩河間事求可諭朝旨慰人心者使焉揆効酌能汝中吾選故不待滿歲擢爲右史出則銜吾命入則記吾言獎任不輕思有所立可依前件

高芳穎等四人各贈刺史制

勅故某官高芳穎等昔文王葬枯骨之無知也但惻隱之心不忍棄也故天下皆歸仁焉況捐軀之魂死節之骨見危授命朕甚憫之深州故小將高某等四人皆從戰陣連歿王事褒贈之數宜其有加並命追榮以光地下可依前件

崔咸可洛陽縣令制

勅度支員外郎崔咸漢以四科辟士求多略不惑強明決斷者任三輔令故今兩京令缺亦擇尙書郎有才理者補之而咸在郡署中推爲利用加以詞學緣飾吏能操割洛陽必有餘刃然宰大邑如烹小鮮人

擾則疲。魚擾則餒。寬猛吐茹。其鑒于茲。可洛陽令。

周愿可衡州刺史尉遲銳可漢州刺史薛鯤可河中少尹三人同制

勅。前復州刺史周愿等。夫勞者之思休息。病者之思救療。人之本情也。今兵戈甫定。物力未豐。如聞湘衡巴漢之間。人有疲困。宜擇良二千石。俾休息而救療之。而愿銳鯤等。前以符竹分領三郡。皆有善政。達于朝廷。舉課考能。無愧是選。息勞救病。其有望於汝乎。河中。吾之股肱郡也。貳尹職而佐府事者。亦在得人。命鯤處之。無荒厥職。可依前件。

楊景復可檢校膳部員外郎鄆州觀察判官李綏可監察御史天平軍判官盧載可協律郎天平軍巡官獨孤涇可監察御史壽州團練副使馬植可試校書郎涇原掌書記程昔範可試正字涇原判官六人同制

勅。某官楊景復等。士子不患無位。患己不立。苟有所立。人必知之。惟爾等六人。蘊才業文。咸士之秀者。果爲賢侯。交辟。俾朕得聞其姓名。是用各進其秩。分授以職。若修飾不已。籌謀有聞。則鴻漸之資。當從此始。而景復稟訓。祇命。頗著令稱。故因滿歲。特假臺郎。古者公臣之良。入補王職。朝獎非遠。爾其勉之。可依前件。

前廬州刺史殷祐可鄭州刺史制

勅。某官殷祐。夫吏寬信。則人人不偷。吏廉明。則人人盡力。吾觀祐之爲政。其近之乎。前守廬江。能率是道。歲會課第。甲於他州。俾精前功。且佇後効。宜換符竹。移牧鄭人。在春秋時。鄭爲侯國。武公善於其職。子產

遺愛於人。人無古今。吏有能否。聽吾用汝。汝其嗣之。可鄭州刺史。

李德循除膳部員外郎制

勅。尚書郎自奏議。彌綸外。凡邦之牲。豆之品。醴膳之數。實糾理之。命文昌長。佐春官卿。以朝散大夫守祕書丞。上柱國李德循。籍訓于台庭。業官于書府。揆才考第。得補爲郎司。膳缺員。爾宜專掌。可尚書膳部員外郎。餘如故。

張正甫可同州刺史制

勅。馮翊。吾左輔也。分理浩穰。率先風化。故其選任。次內史一等。而冠四方岳牧之首焉。宜求吏課高。位望重者。分部共理。以夾輔京師。尚書右丞。賜紫金魚袋張正甫。自登臺閣。爲人讜直。物論時望。敬而重之。及領藩部。爲政寬簡。將吏黎庶。信而愛之。所謂朝廷正臣。郡國良吏。常有惠政。加于是邦。迨茲五年。去思猶在。故輟臺轄。再委郡符。宜敬服新命。增修舊政。俾吏畏如夏日。人歸如流水。慎于終始。典于厥官。可持節同州諸軍事。守同州刺史。充本州防禦使。散官勳如故。

崔瑄可職方郎中侍御史知雜制

勅。近歲已來。副相多缺。朝綱國紀。專委中憲。而侍御史一人。得摠臺事。以左右之。今御史中丞德裕。以中散大夫行尚書吏部員外郎。上柱國崔瑄。守文無害。莅事惟精。在郎署中。推其才理。奏補是職。請觀其能。因而可之。仍加寵秩。操執舉措。爾無自輕。可行尚書職方郎中兼侍御史知雜。散官勳如故。

卷三十三

册新迴鶻可汗文

維長慶元年歲次辛丑四月丙寅朔二十一日丙戌。皇帝若曰。唐有天下。垂二百載。列聖垂拱。八荒卽敝。舟車之所及。日月之所照。威綏仁董。罔不嚮化。惟北之氣。積厚而靈。靈發象生。生爲豪傑。義信武烈。代爲名王。南西東方。亦有君長。較雄鬪智。莫之與京。國朝已來。寢漬風澤。或効功伐。或申婚媾。同和協比。以訖于今。今朕不德。祇嗣大統。推義布信。以初爲常。矧乎柔遠申恩。睦鄰展禮。茲惟舊典。垂自祖宗。虔奉恭行。安敢失墜。咨爾九姓迴鶻君登里羅羽錄沒密施句主錄毗伽可汗。地生奇特。天賜勇智。英姿所莅。雄略所加。諸戎雜虜。愛畏柔服。風靡山立。清寧一方。宜人有士。受天百祿。時推代嗣。實來告予。曰予一人實鄰册命。是用遣使朝議大夫檢校左散騎常侍兼少府監御史大夫雲騎尉賜紫金魚袋裴通。副使朝議大夫守少府少監兼御史中丞襲魏國公食邑三千戶賜紫金魚袋賈隣等。持節備物。册爲登里羅羽錄沒密施句主錄毗伽可汗。於戲。善必有鄰。德無不答。此崇恩禮。則彼竭信誠。克保大義。永藩中夏。昭昭天地。實聞斯言。

册迴鶻可汗加號文

維長慶元年歲次辛丑某月朔某日。皇帝若曰。北方之強。代有君長。作殿玄朔。賓于皇唐。粵我祖宗。錫乃婚媾。五聖六紀。二邦一家。此無北伐之師。彼無南牧之馬。兵匣鋒刃。使長子孫。叶德保和。以至今日。咨爾迴鶻君登里羅羽錄沒密施句主錄毗伽可汗。義智忠肅。武決勇健。天之所授。時而後生。故東漸海夷。西

互山狄。惠寧威制。鱗帖草偃。聲有聞於天下。氣無敵於荒外。而能事大圖遠。納忠貢誠。請仍舊姻。誓嗣前好。朕惟睦鄰是務。柔遠爲心。既降和親之命。遂申飾配之禮。禮物大備。寵章有加。喜動陰山。光增昴宿。夫以迴鶻雄傑。如彼慶榮。若此雖自貴。曰天驕子。未稱其盛。雖自尊。曰天可汗。未稱其美。宜賜嘉號。以大誇將來。今遣使某官某。副使某官某等。持節加册。爲信義勇智。雄重貴壽。天親可汗。於戲。釐降展親。大德也。進册加號。大名也。宜乎思大德。稱大名。懋哉。始終。欽若唐之休命。

制 韋綬從右丞授禮部尚書。薛放從工部侍郎授刑部侍郎。丁公著從給事中授工部侍郎。三人同

勅。尚書右丞韋綬等。朕在東宮時。先皇帝垂慈聖之德。念予冲蒙。選端士通儒。使講貫今古。自禮樂刑政。暨君臣父子之道。博我約我。日就月將。俾予今不至牆面。克荷丕訓。大揚耿光。實綬放公著之力也。故朕嗣位。未逾時月。或自郡邸。或自省署。徵擢寵用。爲丞郎給事官。雖超拜。職亦俱舉。師道光而心愈讓。人爵貴而心益恭。宜更褒升。重酬輔導。以綬精粹辨博。有先儒之風。可作秩宗。以放端明慎重。行君子之道。可居憲部。以公著檢敬規度。得有司之體。可二冬官。於戲。貞百工。平五刑。典三禮。皆重任清秩。子無愛焉。蓋欲表二三子道。不虛行。而明予一人德。無不報也。綬可禮部尚書。放可刑部侍郎。公著可工部侍郎。餘並如故。

李諒除泗州刺史兼團練使。當道兵馬留後兼侍御史。賜紫金魚袋。張愉可岳州刺史同制。勅。扼淮壓湖之列城。曰泗與岳。舟車會焉。軍戎屯焉。是二郡守。不易爲政。先是守領者多。會有政。歲時罷

去長吏數易。人必重困。宜擇良二千石救而養之。以諒自澄。城長訖尙書郎。中間又再爲州牧。三宰劇縣。皆苦心卹隱。煦嫗及物。操刃決滯。春驕有聲。而愉亦學古入仕。甚自修飾。河西有政。次於諒焉。故命愉守岳。命諒守泗。仍以戎職留事。憲簡章綬。一加於諒。諒其聽之哉。異日吾將以重官劇職處爾。爾安得不副吾所急。用爾所長。更宜以難理之郡自試爾。各依前件。

裴廙授殿中侍御史制

勅。某官裴廙。貞觀初。張行成爲殿中侍御史。糾劾巡察。時以爲能。朕思弘貞觀之風。故選御史府官。亦先其精敏剛正者。以爾廙動循道理。語必信直。勵其志節。有類行成。因授厥官。無忝吾舉。可殿中侍御史。

裴通除檢校左散騎常侍兼御史大夫充迴鶻弔祭册立使制

勅。語曰。使於四方。不辱君命。可謂士矣。況馳轡軒奉璽書。稱天子之使。以耀焜絕域者。豈容易其選哉。少府監裴通。溫敬忠實。加之謹敏。有言語。可任以專對。有辯識。可委以便宜。屬北方君長來告代嗣。求可以將命。展禮申吾哀榮之恩者。其任不細。頗難其人。擇臣者君。而通可使。命爲副丞相。而加金貂之貴。授册與節。臨軒遣之。庶乎遠而有光華。且欲使絕俗殊鄰。益敬吾使也。可依前件。

元稹除中書舍人翰林學士賜紫金魚袋制

勅。仲尼曰。志有之。言以足志。文以足言。言之無文。行而不遠。故吾精求雄文達識之士。掌密命。立內庭。甚難其人。爾中吾選。尙書祠部郎中知制誥。賜緋魚袋。元稹。去年夏拔自祠曹員外。試知制誥。而能芟繁詞。剗弊句。使吾文章言語與三代同風。引之而成綸綍。垂之而爲典訓。凡秉筆者莫敢與汝爭能。是用命爾。

爲中書舍人以司詔令。嘗因暇日。前席與語。語及時政。甚開朕心。是用命爾爲翰林學士。以備訪問。仍以章綬寵榮其身。一日之中。三加新命。爾宜率素履。思永圖。敬終如初。足以報我。可中書舍人翰林學士。賜紫金魚袋。

孔戣授尙書左丞制

勅。漢詔丞相歲舉質直忠厚遜讓者。蓋所以急賢俊。扶政教。厚風俗也。然則退藏疎賤之士。苟有一善。尙搜而揚之。況任久位。崇才全望。重而不致於急官。要職者。將何以紀綱庶政。而羽儀朝廷焉。正議大夫守右散騎常侍上柱國。賜紫金魚袋孔戣。自十年來。歷中臺。左曹。國庠。卿寺。洎藩守。近侍之職。各於其任。皆有可稱。矧又貞白端莊。淡然自立。進無矜滿之色。居無墮替之容。求之周行。不可多得。若戣者。宜尙扶政教。厚風俗之選也。尙書丞掌決百事。樞轄六曹。晉魏已還。右卑於左。惟有立者。可以糾吏。惟無瑕者。可以律人。無以易戣。往恭乃位。可尙書左丞。散官勳賜如故。

授柳傑等四人官充鄭滑節度推巡制

勅。試太子司議郎柳傑等。古者公府得自選吏屬。今仍古制。亦命領征鎮者。必先禮聘。而後升聞。矧鄭滑帥承元輸忠仗順。炳焉有大節於國。奉上莅下。實籍寮案。以左右之。而傑等或緣飾華詞。或貯畜才行。揣摩思誠。以待已知。宜展籌謀。用光慰薦。傑可某官。充樂滑節度推官。

韓愈等二十九人亡母追贈郡國太夫人制

勅。王者有褒贈之典。所以旌往而勸來也。其有淑順之德。標表母儀者。聖善之訓。照燭子道者。又有名高

秩尊祿養之不逮者。霜降露濡。孝思之罔極者。非是典也。則何以顯其教而慰其心焉。國子祭酒韓愈母某氏等。蘊德累行。積中發外。歸于華族。生此哲人。爲我蓋臣。率由茲訓。教有所自。恩不可忘。是用啓郡國之封。極哀榮之飾。嗚呼。歿而無知則已。苟有知者。則顯揚之孝。追寵之榮。可以達昊天而貫幽窆矣。往者來者。監予心焉。可依前件。

授駱峻太子司議郎梧州刺史賜緋魚袋兼改名玄休制

勅某官駱峻。桂林守土臣。式方言梧爲要郡。兵後人困。乞廉貞吏以撫之。又言峻守道抱器。可以起用。朕方思良吏以活元元。適副所求。即可其奏。官寮郡印命服嘉名。四者與之。足爲優異。峻宜副所舉。慎所爲。無以滋章爲聰明。無以鹵莽爲高簡。勉率中道。往安梧人。可梧州刺史。

劉總弟約等五人並除刺史賜紫男及姪六人除贊善洗馬衛佐賜緋同制

勅某官劉約等。惟爾先父太師濟經武秉哲。爲國元臣。鎮陽之役。實歿王事。茂勳大節。書於旂常。惟爾兄司空總象賢纂戎。以續名業。納忠於王室。振耀其家聲。而爾約等亦能稟守其風。忠恭孝友。念其義方。訓而不墮。居貴介之地而不驕。況兼器能。皆可任用。授郡符而加命服者五。昇朝序而佐環衛者六。朱轡紫綬。煥赫相望。勳德之家。於斯爲盛。嗚呼。昔武子有遺愛。晉人憐其子。趙季有篤行。漢朝寵其弟。今以濟之仗順積善。宜鍾慶於子孫。以總之輸忠立愛。可延賞於弟姪。多與爵祿。予無惜焉。欲使天下知爾父兄忠順之若彼。而國家報施之如此。可依前件。

王元輔可左羽林衛將軍知軍事制

勅國家設十二衛。猶漢之有南北軍。而左右羽林尤稱親重。自諸衛而移鎮者。謂之美遷。左神武將軍王元輔。生勳伐之家。通吏理之事。佐戎臨郡。率著能名。以掌勾陳而護建章。備巡警而嚴羽衛。大將軍事。假而行之。宜勵初終。副茲寵任。可依前件。

尙書工部侍郎集賢殿學士丁公著可檢校左散騎常侍越州刺史浙東觀察使制

勅古者通守守土。刺史按部。從宜務簡。今則合之。故任日崇。而選日重。非廉平簡直兼愷悌之德者。曾不足中吾選焉。某官丁公著。嘗以學行禮法。誨予一人。報德圖勞。連加寵擢。起曹書殿。兼而委之。二職增修。三命益敬。朕以浙河之左。抵於海隅。全越奧區。延袤千里。宜得良帥。俾之澄清。往分吾憂。無出爾右。假左貂而帖中憲。操郡印而握兵符。勉哉是行。佇聞報政。可依前件。

鄭綱可吏部尙書制

勅天官太宰。秩序常尊。自昔迄今。冠諸卿首。非位望崇盛者。不可以處之。而朕卽位已來。凡命故相領者。三矣。迨此而四。可不重乎。東都留守防禦使檢刑部尙書兼御史大夫滎陽縣開國公鄭綱。有郤吉之寬裕。子產之恭惠。合而爲用。藩輔四朝。故事遺愛。留於官次。國之都府。半在東周。委以保釐。人安吏肅。重煩耆德。入領冢卿。昔魏用崔琰。毛玠典吏曹。一時之士。以廉節自勵。國朝以宋景李父掌選部。亦能遏絕詛僞。振張紀綱。官無古今。得人則理。吾言及此。欲爾繼之。可吏部尙書。

重授李晟通事舍人制

勅李晟。昔管仲云。升降揖讓。進退閑習。臣不如隰朋。今通事舍人近此選也。而晟常中此選。善於其職。故

相導通奏之節。宜揚拜起之儀。引而贊之。不聞失禮。既終喪紀。宜服官常。可使束帶曳裾。爲吾謁者。可通事舍人。

徐登授醴泉令制

勅徐登。京兆尹言登前爲涇陽令。清廉簡直。奉法愛人。請補醴泉。再考其績。昔子路理蒲。仲尼誨曰。愛而恕。可以容困。溫而斷。可以抑姦。今醴泉人與蒲相類。宜用此道。往訓養之。歲時之間。期於報政。可醴泉縣令。

王汶加朝散大夫授左贊善大夫致仕制

勅王汶。善修其身。爲時良士。善訓其子。爲國憲臣。況以待制之年。知終請老。不加優秩。何厚吾風。禮大夫七十而致仕。故吾以朝散贊善二大夫之爵。加乎爾身。惟秩與年。兩皆得禮。以茲退去。亦足爲榮。可依前件。

元公度授華陰令制

勅元公度。吾欲理化萬方。故自近始。前授太宗正鬪印綬。使牧華人。鬪能副吾此心。選吏責課。言公度廉明有守。乞宰華陰。當道東西往來。先是爲邑者多飾廚傳舍。奉賓客以沽名譽。而不親吾人。爾能革之。足爲良宰。敬長畏法。無慢乃官。可華陰縣令。

唐州刺史韋彪授王府長史楊歸厚授唐州刺史劉旻授雅州刺史制

勅韋彪等。善官人者。先考其能。然後授以事。使輪轅鑿枘。各適其用。則羣職庶政。得以交修。今以彪官久

年高勤於爲政。俾從優逸。入補王宮。以歸厚文行器。能辱在巴峽。勵精爲理。績茂課高。區區萬州。豈盡所用。且移大郡。稍展奇才。以旻早著戎行。通詳吏事。西南物土。罔不周知。習俗從宜。宜守嚴道。分命以職。各用所長。庶乎咸修乃官。同底於理。可依前件。

鄭綱烏重胤馬摠劉悟李佑田布薛平等亡母追封國郡太夫人制

勅。經曰。立身揚名。以顯父母。孝之終也。而綱等學文武之道。以飾厥躬。可謂善立身矣。居將相之位。以光大其門。可謂能揚名矣。夫自家所以刑國。本立而後道生。必待我哀榮之恩。方成爾始終之孝。是用啓封追號。各顯乃親。慰後光前。孝道備矣。可依前件。

奉議郎殿中侍御史內供奉飛騎尉賜緋魚袋盧商可劍南西川雲南安撫判官朝散大夫行開州開江縣令楊汝士可殿中侍御史內供奉充劍南西川節度參謀二人同制

勅。劍南西川雲南安撫判官奉議郎殿中侍御史內供奉飛騎尉賜緋魚袋盧商等。士之束髮立身。爲知己用也。無遠邇。無逸勞。但問所務者何。從者誰耳。今蜀之帥。潞之長。皆勤於述職。妙於揀賢。多得其備材。樂告以善道。故以參其選焉。或從事有勞。或卽戎奔命。輟玄黃之著述。振銅墨之滯淹。以良士而贊賢侯。宜乎多成功而鮮敗事矣。勉思所立。各服乃官。

李演贈太子少保制

勅。夫生立勳勤。下以忠事上也。歿加褒飾。上以義答下也。忠義臻其分。哀榮極其恩。而君臣之道全矣。故奉天定難功臣開府儀同三司檢校兵部尙書兼左衛上將軍御史大夫李演。忠信以爲幹。義勇以爲器。

器與幹合。鬱成將材。故出長諸侯。入統七萃。捐循警衛。朕甚賴之。方深倚仗。遽此淪謝。茲予所以當宁興念。廢朝軫懷。聞鼙鼓而長太息者也。追崇之命。宜有加焉。可贈太子少保。

李諒授壽州刺史薛公幹授泗州刺史制

勅。泗州刺史李諒等。詩云。愷悌君子。人之父母。朕三復斯言。往往興歎。安得循吏。俾父母吾人乎。吾前命諒爲泗守。未卽路。會壽守植卒。因改諒守壽。命公幹守泗。諒之理課。前詔詳矣。公幹自尙書郎連領二郡。政平法一。甚便於人。加以有理戎之材。可付留事。故輟軍保。仍憲秩而兼寵之。夫壽與泗。皆郡之大者也。諒與公幹。皆二千石之良者也。以大郡委良吏。不亦宜乎。噫。諒無忘澄城之理。公幹無替亳城之政。則愷悌之化。吾有望於二郡焉。諒可壽州刺史。公幹可泗州刺史。

柳公綽罷監鐵守本官兵部侍郎制

勅。某官柳某。昔先皇帝知爾有材。元和已來。應用不暇。及領擢管漕運之務。屬陵寢郊丘之禮。財給事集。時乃之功。宜有轉移。以均勞逸。況聞牢寵無遺利。課督有常規。令詔刑部尙書播代之。亦令守而勿失。朕將興理化。先務根本。凡百職事。悉歸有司。惟茲夏官。實掌戎政。簡稽調補。今方其時。司馬貳卿。佐乎邦國。是爾本職。無忘增修。可守兵部侍郎。

崔元備張惟素鄭覃陸灑韋弘景賜爵制

勅。崔元備等。禮尊重於復土。事莫大於慎終。使朕以孝敬之誠。獲貢於先帝。實賴左右侍從之臣。服勤祗事。展四體而一心。誠俾予無悔。賞不敢忘。爵不敢愛。爾宜疏封服命而揚之。可依前件。

劉約授棣州刺史制

勅前齊州刺史兼御史中丞劉約。故太保濟之子。太尉總之弟也。吾常思濟之功。總之忠。而嘉約之謹厚。累遷至齊州刺史。在官無敗事。罷秩有去思。念舊錄能。宜當寵用。況公侯之後。約有通才。封域之間。棣爲要郡。委之共理。誰曰不然。可使持節棣州諸軍事。棣州刺史。依前御史中丞。散官勳如故。

李肇可中散大夫郢州刺史王鎰可朗州刺史温造可朝散大夫三人同制

勅。朝請大夫使持節澧州諸軍事澧州刺史上柱國賜紫金魚袋李肇等。乃者李景儉使酒獲戾。而肇等與之會飲。失於檢慎。宜有所懲。由是左遷。分爲郡守。今首坐者旣復班列。緣累者亦當徵還。但以長吏數易。其弊頗甚。況聞三郡皆有政能。人方便安。不宜遷換。故吾以采章階級並命而就加之。蓋漢制進爵秩。降璽書。慰勞良二千石之旨也。爾當是命。得不勉哉。

卷三十四

贈劉總太尉册文

維長慶元年四月某日。皇帝若曰。朕聞古有履忠仗順。生而大有爲者。又有功成身退。歿而永不朽者。非正氣令德。間生挺出。則高名大節。孰兼之哉。故天平軍節度使檢校司徒兼侍中楚國公劉總。降自天和。立爲人傑。得君於先帝。叶運於昌時。纂戎弓裘。守土燕薊。迨此一紀。北方晏然。有開必先。納款於我。沈斷大事。奮揚奇謀。捧幽都四封之圖。挈盧龍三軍之籍。盡獻闕下。高謝人間。感動君臣。驚激忠義。顧妻子若

脫屣視富貴如浮雲。惟道是從。奉身以退。仲連事成而蹈滄海。子房名遂而追赤松。賢明所歸。今古一致。朕方改授兵柄。移鎮鄆郊。命作司徒。倚爲左相。期奮乃志。將沃朕心。而天不憝遺。邦失柱石。夫臣戴君如元首。則君視臣如股肱。股肱或虧。何痛如是。茲朕所以廢朝軫念。備禮加恩。庸建爾於上公。蓋褒贈之崇重者也。嗚呼爾總。尙知之乎。令遣使某官某副使某官某持節冊贈爾爲太尉。

傅良弼可鄭州刺史制

勅。金紫光祿大夫使持節沂州諸軍事行沂州刺史兼御史中丞騎都尉傅良弼。燕冀之間。紛擾之際。多壘失守。孤城保全。介于險中。率乃麾下。轉戰郊野。來覲闕庭。徇義滅親。忘家喪子。忠勤勇烈。人所難能。若不褒升。何勸來者。海沂剖竹。未足報功。溱洧頒條。可兼觀政。敬承後命。無替前勞。可使持節鄭州諸軍事行鄭州刺史兼御史大夫散官勳如故。

河北權鹽使檢校刑部郎中裴弘泰可權知貝州刺史依前權鹽使制

勅。某官裴弘泰以幹蠱之才。領鹽鹵之務。管權條制。動皆得宜。觀其所能。若有餘地。可假兼職。俾之牧人。而河北列城。久乏良吏。俗多思理。政不難施。亦猶凍餒之人。易爲衣食。今予命爾煦而飫之。襦袴之謠。佇入吾耳。可兼知貝州刺史。

崔陵可河南尹制

勅。河洛千里。都畿在焉。俾之乂安。屬在尹正。鳳翔隴州節度觀察處置等使正議大夫檢校禮部尚書兼鳳翔尹御史大夫上柱國開國男食邑三百戶賜紫金魚袋崔陵。有精敏之用。潔直之操。施於有政。由是

知名。始資州縣之勞。卒致公卿之位。況刺部有理行。主計無愆違。尹右輔而鎮西郊。蓋獎能報勤之旨也。昔吳公爲河南守。謹身廉平。人服教化。袁安爲河南尹。政令清肅。號爲嚴明。誰其嗣之。無易陵者。往爲袁則。勿替能名。可檢校禮部尙書兼河南尹。散官勳封賜如故。

侯丕可霍丘縣尉制

勅。賜太常寺奉禮郎翰林待詔上護軍侯丕。夫執藝以事上。奉詔而處中。其於出入謹身。夙夜祇命。比他局署。實倍恭勤。旣寵之以職名。又優之以祿俸。蓋先勞後食之義也。汝其承之。可守壽州霍丘縣尉。依前翰林待詔勳如故。

崔楚臣可兼殿中侍御史制

勅。成德軍節度押衙銀青光祿大夫檢校太子賓客兼監察御史崔楚臣。材膺爪士。職在牙旗。每祇命以奉辭。必竭誠而得禮。旣嘉詳敏。亦念恭勤。式示寵名。宜遷憲秩。可殿中侍御史。餘如故。

王庭湊曾祖可贈越州都督祖末怛活可贈左散騎常侍父昇朝可贈禮部尙書制

勅。成德節度鎮冀深趙等州觀察處置等使金紫光祿大夫檢校工部尙書兼鎮州大督府長史大夫上柱國大原縣開國男食邑三百戶王庭湊曾祖故忠武將守左武衛大將軍員外置同正員兼試太常卿五哥之等。鬼神有知。履孝敬者。福祿至。王侯無種。仗忠信者。富貴來。我有列臣。本於良胤。奮發而勵節許。國感激而揚名。顯親夫教。必有初。德無不報。安有收其材而遺其本。愛其後而忘其先乎。是用褒崇。以弘寵澤。庶使聞者起孝作忠。可依前件。

崔羣可祕書監分司東都制

勅前武寧軍節度徐泗濠等觀察處置等使正議大夫檢校兵部尚書使持節徐州諸軍事兼徐州刺史御史大夫上柱國賜紫金魚袋崔羣受天至寶爲國重器始自修己移於事君輔弼藩宜不失其道及離征鎮召赴闕庭方登道途遂遭疾恙正在頤養之際豈任朝謁之勞誠宜許以便安不可闕其祿食而移秩外史分曹東周加寵優賢無易於此且有後命俟其有瘳可守祕書監分司東都散官勳賜如故。

董昌齡可許州長史制

勅將仕郎權知泗州長史兼殿中侍御史賜緋魚袋董昌齡頃爲宰邑今贊郡符皆聞約己之名每展存公之節稽其器局允謂廉能議以稍遷用彰勤効可許州長史兼侍御史散官勳如故。

柳經李褒並泗州判官制

勅徵事郎前河南府河南縣尉柳經儒林郎試太子通事舍人李褒等瀕淮列城泗州爲要控轉輸之路屯式遏之師故府有寮軍有倅選擇補署得聞於朝廷而經等皆有所長宜當是選守臣置奏因而可之仍加秩命用示優寵經可監察御史充泗州團練副使散官如故褒可試太常寺協律郎充武寧軍節度泗州兵馬留後判官仍故名言散官勳如故。

張諷等四人可兼御史中丞侍御史監察御史同制

勅義成軍節度馬步都知兵馬使光祿大夫檢校太子詹事兼侍御史上柱國張諷等御史府自中執憲暨察視之官皆顯秩也唯懷材而展効者可以授焉爾等昨領偏師出疆赴難指蹤而去摩壘而還忠勇

勤勞宜有加獎。故以憲職第而寵之。可依前件。

啖異可。滁州長史許志雍。可。永州司戶崔行儉。可。隋州司戶並准赦量移制。

勅守袁州司馬員外置同正員啖異等。有司奉新制。明舊章。凡負疵瑕。必需慶澤。況爾等各有才用。多淹歲時。譴累重輕。遽從恩貸。班資遠邇。率以例遷。如聞進修。豈忘牽復。可依前件。

程執撫亡父懷信贈太保李佑亡父景略贈太子少傅柏耆亡父良器贈太子少保白餘盛亡父

孝德贈太保同制

勅中散大夫檢校右散騎常侍兼右神武軍大將軍知軍事御史大夫上柱國河東縣開國男食邑三百戶賜紫金魚袋程執撫父贈太子太保懷信等。咸有忠勳。播爲先德。悉承義訓。垂在後昆。故吾令臣。皆乃愛子。襲弓裘而稟詩禮。猶水木之有本源。將使天下之爲人子者。感恩天下之爲人父者。知勸。宜加寵贈。以表顯揚。可依前件。

嚴謨可桂管觀察使制

勅漢置部刺史。掌奉詔條。糾吏理。蓋今觀察使職耳。桂林秦郡也。東控海嶺。右扼蠻荒。自隋迄今。不改戎府。地遠則權重。俗殊則理難。馴而化之。非才不可。朝議大夫前守祕書監驍騎尉賜紫金魚袋嚴謨。嘗守商洛。刺黔巫州部縣道。謐然安理。是能用寬猛相濟之政。撫夷夏雜居之人故也。跡其往効。式是南邦。況爾操行端和。文學精茂。賓寺書府。善於其官。勉副前言。佇申後命。可使持節都督桂州諸軍事。守桂州刺史兼御史中丞。桂州本管都防禦觀察處置等使。散官勳如故。

杜式方可贈禮部尚書制

勅。生有寵祿。歿有褒崇。此王者所以明終始之恩。厚君臣之道也。故桂州本管都防禦觀察等使正議大夫使持節都督桂州諸軍事守桂州刺史兼御史中丞上柱國南陽縣開國男賜紫金魚袋杜式方。慶襲台庭。任當垣翰。服名教乃保家之子。樹風聲爲守土之臣。盡禮事君。勞心奉職。奄忽淪逝。念之惻然。況近屬連姻。遠藩捐館。聞訃之命。實悼中心。贈飾之恩。宜加常等。俾趨榮於八座。用賁寵於九原。可贈禮部尚書。仍賻布帛二百段。米粟二百石。委度支逐便支遣。

武昭除石州刺史制

勅。某官武昭。王師伐蔡。爾在行間。致命奮身。挑戰當寇。忠憤所感。卒獲生全。求之軍中。不可多得。司馬以爾信直謹厚。可領邊城。爾宜酬乃已知。副我朝獎。撫獮戎。雜居之俗。安離石重困之人。免而莅之。其任不細。可石州刺史。

梁希逸除蔚州刺史制

勅。某官梁希逸。頃爲蔡將。陷在賊庭。知有君臣。不顧妻子。率其所屬。當戰陣前。反旆倒戈。翻然歸我。忘家之士。希逸有之。間從司空。再平淮右。指蹤銜命。皆稱所使。可以移用。俾之守疆。北邊列城。蔚爲衝要。雄右軍號。務兼錢刀。臚勳選能。俾乃兼領。宜思來効。以續前勞。可蔚州刺史。兼橫野軍使。并知本州鑄錢事。

盧元勳除隰州刺史制

勅。盧元勳。乃者鎮帥身喪。正承元納款之際。柏耆將命之初。軍情洵然。未知嚮化。而元勳挺身奮臂。出於

衆中指明安危。分別逆順。色顏不撓。聲氣甚厲。言行事立。朕甚多之。雖有優升。未酬義烈。宜以一郡寵而旌之。用勸四方。聞其風者。可隰州刺史。

楊孝直除滑州長史制

勅。楊孝直。早以材力。從戎冀方。專習武經。通知吏事。承元移鎮。孝直實來詢謀。驅馳有所裨助。軍郡之佐。寵秩非輕。用答忠勞。以明勸獎。可滑州長史。

張嘉泰延州長史制

勅。前丹州司馬張嘉泰。一從戎旅。多歷歲時。奉職有勞。率身無過。軍部長佐。資秩不卑。自丹轉延。頗爲優穩。題輿便道。往守乃官。可延州長史。

魏玄通除深王府司馬制

勅。魏玄通。有禦侮之才。扞城之略。服勤戎職。善守邊州。訓旅牧人。有可稱者。夫文武迭用。出入序遷。所以關才能而均勞逸也。爾宜解綬郡邸。曳裾王門。飾躬慎儀。以奉朝謁。可依前件。

楊造等亡母追贈太君制

勅。通事舍人楊造。翰林待詔某亡母等。生播徽華。歿留儀範。訓保家之子。爲有國之臣。或相禮彤庭。或待詔金馬。咸居禁近。率有忠勤。風樹之心。必憂深而思遠。蓼蕭之澤。宜自葉而流根。並啓邑封。各從子貴。揚名之孝。與汝成之。可依前件。

張植李翺等二十人亡母追贈郡縣夫人制

勅壽州刺史張植亡母某氏等。夫忠於上者。教有所自。仁於下者。恩有所延。孝理之風。實繇此作。當今良二千石。皆與朕共理。雖祿不逮養。而名可顯親。將慰匪莪之心。宜流自葉之澤。俾從子貴。咸贈邑封。

陳中師除太常少卿制

勅尚書吏部郎中兼侍御史陳中師。早以體物之文。待問之學。中鄉里選。第甲乙科。及筮仕立身。皆有本末。不背俗以矯逸。不越時以沽名。從容中道。自致問望。累踐郎署。再參憲司。官無卑崇。事無簡劇。如玉在佩。動必有聲。爲時所稱。何用不可。朕以立國之本。禮樂爲先。今之太常。兼掌其事。貳茲職者。不亦重乎。歷代迄今。謂之清選。往復是命。佇觀有成。予方急才。爾寧久次。可太常少卿。

衢州刺史鄭羣可庫部郎中齊州刺史張士階可祠部郎中同制

勅某官鄭羣等。今之正郎。班望頗重。中外要職。多繇是遷。故其所選。不得不慎。必循名實而後命之。羣與士階。久典名郡。謹身化下。有循吏之風。會課陟明。宜當是選。國之大事。在祀與戎。一掌祠曹。一司武庫。各領其要。爾宜敬之。羣可庫部郎中。士階可祠部郎中。

元稹可太子左諭德依前入蕃使制

勅通事舍人元稹。東宮之有諭德。猶上臺之有騎省也。清班優秩。所選非輕。朕前遣使臣。往修戎好。以稹言信行敬。命爲介焉。揚旌出疆。反駕奔命。有所啓奏。多叶便宜。乃知得人。可以卒事。故加是命。以寵勸之。可太子左諭德。依前入蕃使。

盧昂量移虢州司戶長孫鉉量移遂州司戶同制

勅萬州司戶參軍盧昂等。頃負疵瑕。各從譴謫。或遠竄荒裔。或未復班資。旣逢蕩滌之恩。俾及轉遷之命。況聞修省以克己。因將校試而用能。吾無棄人。汝宜自効。可依前件。

李石楊穀張殷衡等並授官充涇原判官同制

勅李石等。用武之地。曰涇與原。合爲一鎮。控扼夷虜。朕授布鉞。責其成功。布乃祇惕受命。思有以自輔者。因上言石穀殷衡等。學業才畫。堪置帳中。分務列官。咸可其請。而布憂邊甚切。選士必精。爾宜各竭所能。爲知己用。可依前件。

李演除左衛上將軍制

勅王者法句陳。設環列。非勳勤之將。信近之臣。則何以久張爪牙。轉置肘腋者也。某官李演。嘗從德宗皇帝南蒐於梁。籍名功臣。謂之定難。洎出分戎律。入拱宸居。內外周旋。不懈於位。交戟之下。周廬肅然。今之轉遷。示益親信。移領左廣。仍參夏卿。夫八屯之警巡。七萃之勳墮。爾爲其正。盡得察之。宜惜前勞。無墮乃力。可依前件。

康昇讓可試太子司議郎知欽州事兼充本州鎮遏使陳倓可試太子舍人知巒州事兼充本州鎮遏使李顯可試太子通事舍人知賓州事兼賓澄巒橫貴等五州都遊奕使馮緒可試太子通事舍人知田州事充右江都知兵馬使滕殷晉可試右衛率府長史知瀘州事兼充左江都知兵馬使五人同制

勅容州本貫經略招討左押衙兼右廂兵馬使康昇讓等有奉職徇公之勤。有理戎殄寇之効。其帥公素

上章以聞。吾方念勞。爾宜受賞。況容之諸郡有大小。郡之兼職有重輕。量能第功。分命而往。噫。方藩雖遠。朝聽甚卑。有善必聞。無功不錄。吾言及此。欲爾知之。可依前件。

西川大將賀若岑等一十二人授御史中丞殿中監察及諸州司馬同制。

勅丞相鎮蜀。志在憂邊。俾靜蕃蠻。實資將校。故加寵任。以責成功。某官某等若干人。類例勳勞。進登班秩。憲官名重。郡佐祿優。參以命之。足爲榮獎。爾宜恭承主帥。慎守封疆。勦力一心。無落戎事。可依前件。

前右羽林將軍李彥佐服闋重除本官兼御史中丞知軍事制

勅軍有羽林。用法星象。統之爪士。以拱宸居。某官某前以忠勞。選登戎衛。而能訓勇力之士。以備時使。申誰何之令。以奉徼巡。夙夜祗嚴。不懈於位。既終喪紀。宜復官常。假中執憲之名。行上將軍之事。勉修舊職。用副新恩。可依前件。

奉天縣令崔鄴可倉部員外郎判度支案制

勅奉天縣令崔鄴。大凡南宮郎。無非慎選者也。況官之屬。有堆案盈机之文。有月計歲會之課。故員外郎不可逾時缺。不待滿歲遷。事劇才難。斷可知矣。而鄴自操白簡。宰赤縣。繩舉違謬。惠養鰥嫠。皆有善聲。著於官次。豈能於彼而不能於此乎。爾宜率廩人。佐計務。決繁折滯。期有可觀。可依前件。

翰林待詔李景亮授左司禦率府長史依前待詔制

勅某官李景亮。夫執藝事上者。必授日時。計勞績。而後進爵秩。以旌服勤。況待詔宮闈。飾躬晨夜。比於他職。宜有加恩。宮坊衛官。以示優獎。可依前件。

故鹽州防秋兵馬使康太崇贈鄧州刺史制

勅。故某官康太崇。嘗習韜鈴。夙稱拳勇。使之訓旅。能叶武經。使之守疆。能著戎績。永言殂謝。宜及褒榮。俾追寵於朱轡。庶知恩於黃壤。可贈鄧州刺史。

劉總外祖故瀛州刺史盧龍軍兵馬使張懿贈工部尚書制

勅。故某官張懿。德善者將啓後人。忠孝者克揚前烈。有美必復。宜其然乎。而懿仗忠履義。體仁養勇。學究韜略。藝窮騎射。負幽燕之勁氣。雖振其名。有將相之長才。不得其位。命屈當代。慶流後昆。有外孝孫。爲吾賢帥。以忠許國。以順克家。揚名顯親。自義率祖。推恩外族。歸美前修。俾追八座之榮。以轍九原之歎。可依前件。

劉總外祖母李氏贈趙國夫人制

勅。李氏族茂本枝。行光內則。柔明繕性。和淑保身。輔佐良人。克諧家道。訓成賢女。作相令門。善積於中。福延於後。段公威德。當流慶於外孫。令伯孝心。願推恩於祖母。式遵贈典。用贊德芬。宜崇大國之封。追正小君之命。可贈趙國夫人。

蕭俛一子迴授三從弟伸制

勅。吏部尚書蕭俛。頃在台庭。時逢郊禮。大行慶澤。先及輔臣。當延賞於胤嗣。願推恩於友愛。厥有典例。因而從之。爾弟伸。可口口口命。可河中府參軍。

賈隣入迴鶻副使授兼御史中丞賜紫金魚袋制

勅少府少監賈曄。行人之官。官必有介。所以敬王事而重國命也。以爾曄稟訓台鼎。飾躬摺紳。自登班行。多歷年祀。恪勤官次。保守令名。斯可以卒貳使臣。諭申朝旨。宜假憲秩。仍加命服。以示兼寵。俾之出疆。況繼好二邦。奉辭萬里。副車之任。選亦不輕。茲吾使能。期爾復命。可依前件。

張昺授廬州刺史兼御史中丞制

勅廬龍軍節度判官檢校刑部郎中張昺。司徒總言。爾從事於幽薊之間。有年歲矣。嘗委事任。備觀器用。務叢而益辨。職久而彌勤。頗出輩流。宜加獎擢。況公侯之嗣。幕府之英。餘慶所鍾。有才如是。今以名郡寵而任之。旌善勸能。仍兼中憲。可廬州刺史。

韓公武授左驍衛上將軍制

勅朝散大夫檢校左散騎常侍兼右金吾衛將軍御史大夫上柱國賜紫金魚袋韓公武。我元老之令子也。孝於家。忠於國。故出則秉旄鉞。入爲執金吾。寵任益崇。謙敬彌著。而勤於夙夜。疾癘所侵。上陳表章。乞就頤養。夫環衛之列。心膂之臣。雖親信之寄。則同。而勞逸之間。或異。宜輟繁重。俾從便安。可檢校左散騎常侍兼左驍衛上將軍御史大夫。散官勳如故。

姚元康等授官充推官掌書記制

勅朝散郎行秘書省秘書郎姚元康。儒林郎試太常寺協律郎鄭懿等。益部浮陽。皆大征鎮也。文昌全略。皆賢將相也。而能以禮聘士。以職任才。多聞得人。咸樂爲用。況爾等籌謀文藻。各負所長。苟能贊察。兼掌奏記。孜孜不怠。翩翩有聲。慰薦褒升。其則不遠。元康可試左武衛倉曹參軍。充劍南西川觀察推官。散官

如故。懿可試左金吾衛兵曹參軍。充橫海軍節度掌書記。散官如故。

楊玄諒等三十人加官制

勅。右神策軍忻州行營兵馬使試太常卿楊玄諒等。夫材不錄。則勸善之道廢。勤不賞。則念功之典缺。而玄諒輩凡三十人。咸列禁戎。遠從征討。臨難有身先之勇。奔命無道弊之勞。宜以祿秩。酬其忠効。所謂材不失選。賞不逾時。亦欲使爲善者不疑。有功者速勸也。可依前件。

李益王起杜元穎等賜爵制

勅。李益等。去年春。朕以陵寢事大。哀惶疚心。而益等齋慄奔走。各率其職。俾予孝道。刑于四海。何嘗一日而忘之耶。因命有司。舉常典。凡爵之高下。視執事之重輕。有司亦能遵我成命。第而次之。進給益封。無有不當。由益而下。爾宜欽承。可依前件。

王計除萊州刺史吳暉除蓬州刺史制

勅。王計等。咸以材略。載筆從軍。藝學智謀。濡然足用。多歷年紀。備嘗艱危。進退周旋。不聞失道。司徒弘正。詳奏以聞。因以竹符。分命試吏。而萊蓬二郡。各介一方。牧人者。但不擾其心。不奪其力。則雖華夷南北。土物不同。皆可以自足自遂矣。宜用此道。往安養之。可依前件。

義武軍奏事官虞候衛紹則可檢校祕書監職如故制

勅。某官衛紹則。服勤藩鎮。敷奏闕庭。奉主帥之表章。達軍府之情狀。嘉其忠効。宜可褒升。俾洽新恩。用充舊職。可依前件。

深州奏事官衛推試原王友韓季重可兼監察御史充職制

勅某官韓季重上將臨戎陪臣將命詳其奏報頗盡事情特加寵章用獎勞効王官憲職以示兼榮可依前件

袁幹可封州刺史兼侍御史制

勅安南兵馬使封州刺史兼監察御史袁幹委質藩方悉知戎旅嘗驅寇盜累著功勞故命遷領郡符超升憲簡足以安荒俗耀遠人敬而承之無替前効加封州刺史

華州及陝府將士吉少華二千三百三十五人各賜勳五轉制

勅某官吉少華等距河重鎮分陝近藩俾遏寇虞實資士旅勞既同力賞宜徧行次第其名書于勳籍可各賜勳五轉

祭迴鶻可汗文

維長慶元年歲次辛丑月日皇帝遣使朝議大夫檢校右散騎常侍兼少府監御史大夫雲騎尉賜紫金魚袋裴通致祭于故愛登羅汨沒蜜施毗伽保義可汗之靈粵以英武之姿雄奇之策撫有九姓制臨一方氣吞諸戎名播上國況能嚮風納款繼好息人代爲親鄰歲入職貢方賴威略共清寰瀛倚爲長城永固中夏而天殲驕子國喪名王奪氣色於陰山賈精光於昴宿凶訃云至悲懷用深故遣使臣往將國命展弔奠之禮申哀榮之恩猶有明靈當鑒誠意尙饗

